

四庫全書

子部

欽定四庫全書

子部

法書要錄

目錄
卷二

詳校官中書臣王鵬

檢討臣德生覆勘

覆校官主事臣李駿

校對官主事臣張培

謄錄監生臣陸費鑒

欽定四庫全書卷

子部八

法書要錄目錄

藝術類一書畫之屬

卷一

後漢趙壹非草書

晉王羲之論書

王羲之教子敬筆論

不錄

晉衛夫人筆陣圖

王羲之題筆陣圖後

宋羊欣采能書人名

齊王僧虔答太祖書

王僧虔論書

宋王愔文字志目

齊蕭子雲啟

卷二

梁虞龢論書表

梁武帝論鍾書十二意

梁武帝與陶隱居論書啓九首

梁庾元威論書

梁庾肩吾書品論

梁袁昂古今書評

陳釋智永題右軍樂毅論後

後魏江式論書表

卷三

唐虞世南書旨述

褚遂良右軍書目

李嗣真後書品

武平一徐氏法書記

徐浩論書

徐浩古迹記

何延之蘭亭記

褚遂良榻本樂毅論記

崔備壁書飛白蕭字記

李約壁書飛白蕭字記

大父相國高平公蕭齊記

蔡惲書無定體論

不錄

卷四

顏師古註急就章

不錄

張懷瓘書話

張懷瓘二王等書錄

張懷瓘書議

張懷瓘文字論

張懷瓘六體書

不錄

唐朝敘書錄

韋述敘書錄

盧元卿法書錄

卷五

竇泉述書賦上

卷六

竇泉述書賦下

卷七

張懷瓘書斷上

卷八

張懷瓘書斷中

卷九

張懷瓘書斷下

卷十

右軍書記

臣等謹案法書要錄十卷唐張彥遠撰書首有彥遠自序但題郡望而不著官爵郭若虛圖畫見聞志晁公武讀書志亦止稱其字曰愛賓而未詳其家世故明毛晉跋第以河東張氏目之今以新唐書世系表列傳與彥遠自序參考知彥遠乃明皇時宰相嘉貞之玄孫序稱高祖河東公者即嘉貞其稱曾祖魏

國公者為同平章事延賞稱大父高平公者
為同平章事弘靖稱先君尚書者為桂管觀
察使文規唐書皆有傳而延賞封魏國公本
傳不載惟見於彥遠之序本傳又稱彥遠博
學有文辭乾符中至大理卿而世系表作祠
部員外郎則當以傳為得實此書末載畫譜
本傳乃謂彥遠大父名稔不知何據蓋未攷
唐書而附會之者也史又載弘靖家聚書畫

俾秘府彥遠承其餘澤故聞見尤富是編集
古人論書之語起於東漢迄於元和皆具錄
原文而如王愔文字志之未見其書者則特
存其目編次極為詳贍其中不加論斷而李
嗣真書品後之類間亦有注語者疑即彥遠
所自附考藝文畧所紀法書一類自漢至唐
凡六十餘家今多佚不傳而庾肩吾張懷瓘
竇泉等著述獨賴此書以得顯於世則蒐羅

裒輯之功為不可沒矣乾隆四十二年八月

恭校上

總纂官臣紀昀臣陸錫熊臣孫士毅

總校官臣陸費墀

張彥遠法書要錄自序

彥遠家傳法書名畫自高祖河東公收藏珍祕河東公

書迹俊異尤能大書本傳云不因師法而天姿雄勁

定州

北嶽碑為好事所傳

曾祖魏國公少稟師訓妙合鍾張尺牘尤為

合作大父高平公幼學元常自鎮蒲陝迹類子敬及處

台司乃同逸少書體三變為時所稱金帛散施之外悉

購圖書古來名迹存於篋笥元和十三年憲宗累訪珍

迹當時不敢緘藏遂皆進獻長慶初又於幽州散失傳

家所有十無一二先君尚書少耽墨鈔備盡楷模彥遠
自幼至長習熟知見竟不能學一字夙夜自責然而收
藏鑒識有一日之長因採掇自古論書凡百篇勒為十
卷名曰法書要錄又別撰歷代名畫記十卷有好事者
得余二書書畫之事畢矣豈敢言具哉

欽定四庫全書卷

法書要錄卷一

唐 張彥遠 撰

後漢趙一非草書

晉王羲之論書

晉王羲之教子敬筆論

不錄

晉衛夫人筆陣圖

王羲之題筆陣圖後

宋羊欣采能書人名

齊王僧虔荅太祖書

王僧虔論書

宋王愔文字志目

齊蕭子雲啟

後漢趙一非草書

余郡士有梁孔達姜孟穎者皆當世之彥哲也然慕張
生之草書過於希顏孔焉孔達寫書以示孟穎皆口誦
其文手楷其篇無怠倦焉於是後學之徒競慕二賢守

令作篇人撰一卷以為秘玩余懼其背經而趨俗此非所以弘道興世也又想羅趙之所見嗤沮故為說草書本末以慰羅趙息梁姜焉竊覽有道張君所與朱使君書稱正氣可以銷邪人無其釁妖不自作誠可謂信道抱真知命樂天者也若夫褒杜崔沮羅趙忻忻有自臧之意者無乃近於矜伎賤彼貴我哉夫草書之興也其於近古乎上非天象所垂下非河洛所吐中非聖人所造蓋秦之末刑峻網密官書煩冗戰攻並作軍書交馳

羽檄紛飛故為隸草趣急速耳示簡易之指非聖人之業也但貴刪難省煩損複為單務取易為易知非常儀也故其讚曰臨事從宜而今之學草書者不思其簡易之旨直以為杜崔之法龜龍所見也其攢扶柱桎詰屈反乙不可失也齟齬以上苟任涉學皆廢倉頡史籀競以杜崔為楷私書相與庶獨就書云適迫遽故不及草草本易而速今反難而遲失指多矣凡人各殊氣血異筋骨心有疏密手有巧拙書之好醜在心與手可強為

哉若人頗有美惡豈可學以相若耶昔西施心跡捧胃
而顰衆愚效之祇增其醜趙女善舞行步媚盡學者弗
獲失節匍匐夫杜崔張子皆有超俗絕世之才博學餘
暇遊手于斯後世慕焉專用為務鑽堅仰高忘其罷勞
夕惕不息仄不暇食十日一筆月數丸墨領袖如皁唇
齒常黑雖處衆坐不遑談戲展指畫地以草創壁臂穿
皮刮指爪摧折見腮出血猶不休輟然其為字無益於
工拙亦如効顰者之增醜學步者之失節也且草書之

人蓋伎藝之細者耳鄉邑不以此較能朝廷不以此科
吏博士不以此講試四科不以此求備徵聘不問此意
考績不課此字徒善字既不達於政而拙草無損於治
推斯言之豈不細哉夫務內者必闕外志小者必忽大
俯而捫蟲不暇見天天地至大而不見者方銳精於蟻
蟲乃不暇焉第以此篇研思銳精豈若用之於彼七經
稽歷協律推步期程探賾鉤深幽贊神明鑒天地之心
推聖人之情析疑論之中理俗儒之諍依正道於邪說

齊雅樂於鄭聲興至德之和睦弘大倫之玄清窮可以
守身遺名達可以尊主致平以茲命世永鑒後生不以
淵乎

晉王右軍自論書

吾書比之鍾張當抗行或謂過之張草猶當雁行張精
熟過人臨池學書池水盡墨若吾耽之若此未必謝之
後達解者知其評之不虛吾盡心精作亦久尋諸舊書
惟鍾張故為絕倫其餘為是小佳不足在意去此二賢

僕書次之須得書意轉深點畫之間皆有意自有言所
不盡得其妙者事事皆然平南李式論君不謝

平南即右軍叔

平南將軍王廙也李式晉侍中

晉衛夫人筆陣圖

夫三端之妙莫先乎用筆六藝之奧莫匪乎銀鉤昔秦
丞相斯見周穆王書七日興歎患其無骨蔡尚書入鴻
都觀碣十旬不返嗟其出羣故知達其源者少闇於其
理者多近代以來殊不師古而緣情弃道纔記姓名或

學不該瞻聞見又寡致使成功不就虛費精神自非通
靈感物不可與談斯道今刪李斯筆鈔更加潤色總七
條并作其形容列事如左貽諸子孫永為模範庶將來
君子時復覽焉筆要取崇山絕仞中兔毛八九月收之
其筆頭長一寸管長五寸鋒齊腰强者其硯取煎涸新
石潤澀相兼浮津耀墨者其墨取廬山之松煙代郡之
鹿膠十年已上強如石者為之紙取東陽魚卵虛柔滑
淨者凡學書字先學執筆若真書去筆頭二寸一分若

行草書去筆頭三寸一分執之下筆點墨畫波屈曲
皆須盡一身之力而送之若初學先大書不得從小善
鑒者不寫善寫者不鑒善筆力者多骨不善筆力者多
肉多骨微肉者謂之筋書多肉微骨者謂之墨猪多力
豐筋者聖無力無筋者病一一從其消息而用之

一 如千里陣雲隱隱然其實有形

、 如高峰墜石磕磕然實如崩也

ノ 陸斷犀象

ㄣ 百鈞弩發

一 萬歲枯藤

ㄣ 崩浪雷奔

ㄣ 勁弩筋節

右七條筆陣出入斬斫圖執筆有七種有心急而執筆
緩者有心緩而執筆急者若執筆近而不能緊者心手
不齊意後筆前者敗若執筆遠而急意前筆後者勝又
有六種用筆結構圓備如篆法飄颻灑落如章草凶險

可畏如八分窈窕出入如飛白耿介特立如鶴頭鬱拔
縱橫如古隸然心存委曲每為一字各象其形斯造妙
矣書道畢矣永和四年上虞製記

王右軍題衛夫人筆陣圖後

夫紙者陣也筆者刀稍也墨者鍔甲也水硯者城池也
心意者將軍也本領者副將也結構者謀畧也颺筆者
吉凶也出入者號令也屈折者殺戮也夫欲書者先乾
研墨凝神靜思預想字形大小偃仰平直振動令筋脈

相連意在筆前然後作字若平直相似狀如算子上下
方整前後齊平此不是書但得其點畫爾昔宋翼常作
此書翼是鍾繇弟子繇乃叱之翼三年不敢見繇即潛
心改迹每作一波常三過折筆每作一點常隱鋒而為
之每作一橫畫如列陣之排雲每作一戈如百鈞之弩
發每作一點如高峰墜石屈折如鋼鉤每作一牽如萬
歲枯藤每作一放縱如足行之趣驟翼先來書惡晉太
康中有人於許下破鍾繇墓遂得筆勢論翼乃讀之依

此法學名遂大振欲真書及行書皆依此法若欲學草書又有別法須緩前急後字體形勢狀等龍蛇相鉤連不斷仍須稜側起復用筆亦不得使齊平大小一等每作一字須有點處且作餘字攄竟然後安點其點須空中遙擲筆作之其草書亦復須篆勢八分古隸相雜亦不得急令墨不入紙若急作意思淺薄而筆即直過惟有章草及章程行狎等不用此勢但用擊石波而已其擊石波者缺波也又八分更有一波謂之隼尾波即鍾

公泰山銘及魏文帝受禪碑中已有此體夫書先須引
八分章草入隸字中發人意氣若直取俗字不能先發
義之少學衛夫人書將謂大能及渡江北遊名山比見
李斯曹喜等書又之許下見鍾繇梁鵠書又之洛下見
蔡邕石經三體書又於從兄洽處見張昶華岳碑始知
學衛夫人書徒費年月耳羲之遂改本師仍於衆碑學
習焉遂成書爾時年五十有三或恐風燭奄及聊遺教
於子孫耳可藏之千金勿傳

宋羊欣采古來能書人名

齊王僧虔錄

臣僧虔啟昨奉敕湏古來能書人名臣所知局狹不辦
廣悉輒條疏上呈羊欣所撰錄一卷尋案未得續更呈
聞謹啟

秦丞相李斯

秦中車府令趙高

右二人善大篆

秦獄吏程邈善大篆得罪始皇囚於雲陽獄增減大篆
體去其繁複始皇善之出為御史名書曰隸書

扶風曹喜後漢人不知其官善篆隸篆小異李斯見師
一時

陳留蔡邕後漢左中郎將善篆隸林斯喜之法真定宜
父碑文猶傳於世篆者師焉

杜陵陳遵後漢人不知其官善篆隸每書一座皆驚時
人謂為陳驚座

上谷王次仲後漢人作八分楷法

師宜官後漢不知何許人何官能為大字方一丈小字

方寸十言耿球碑是宜官書甚自矜重或空至酒家先書其壁觀者雲集酒因大售俟其飲足削書而還

安定梁鵠後漢人官至選部尚書得師宜官法魏武重之常以鵠書懸帳中宮殿題署多是鵠手

陳留邯鄲淳為魏臨淄侯文學得次仲法名在鵠後

毛弘鵠弟子今祕書八分皆傳弘法又有左子邑與淳小異亦有名

京兆杜度為魏齊相始有草名

安平崔瑗後漢濟北相亦善草書平符堅得摹崔瑗書
王子敬云極似張伯英瑗子實官至尚書亦能草書

弘農張芝高尚不仕善草書精勁絕倫家之衣帛必先
書而後練臨池學書池水盡墨每書云囟囟不暇草書
人謂為草聖芝弟昶漢黃門侍郎亦能草今世云芝草
者多是昶作也

姜詡梁宣田彥和及司徒韋誕皆英弟子並善草誕書
最優誕字仲將京兆人善楷書漢魏宮館寶器皆是誕

手寫魏明帝起凌雲臺誤先釘榜而未題以籠盛誕輓
轡長絙引之使就榜書之榜去地二十五丈誕甚危懼
乃擲其筆以下焚之仍誡子孫絕此楷法著之家令官
至鴻臚少卿誕子少季亦有能稱

羅暉趙襲不詳何許人與伯英同時見稱西州而矜許
自與衆頗惑之伯英與朱寬書自叙云上比崔杜不足
下方羅趙有餘

河間張超亦善草不及崔張

劉德昇善為行書不詳何許人

潁川鍾繇魏太尉同郡胡昭公車徵二子俱學於德昇而胡書肥鍾書瘦鍾書有三體一曰銘石之書最妙者也二曰章程書傳祕書教小學者也三曰行狎書相聞者也三法皆世人所善繇子會鎮西將軍絕能學父書改易鄧艾上事皆莫有知者

河東衛覲字伯儒魏尚書僕射善草及古文畧盡其妙草體微瘦而筆跡精熟覲子瓘字伯玉為晉太保採張

芝法以覲法叅之更為草藁草藁是相聞書也璿子恒亦善書博識古文

燉煌索靖字幼安張芝姊之孫晉征南司馬亦善草書陳國何元公亦善草書

吳人皇象能草世稱沉著痛快

滎陽陳暢晉秘書令史善八分晉宮觀城門皆暢書也滎陽楊肇晉荊州刺史善草隸潘岳誄曰草隸無善尺牘必珍足無輟行手不釋文翰動若飛紙落如雲肇孫

經亦善草隸

京兆杜畿魏尚書僕射子恕東郡太守孫預荊州刺史

三世善草藁

晉齊王攸善草行書

泰山羊忱晉徐州刺史羊固晉臨海太守並善行書

江夏李式晉侍中善隸草弟定子公府能名同式

晉中書院李充母衛夫人善鍾法王逸少之師

瑯琊王廙晉平南將軍荊州刺史能章楷傳鍾法

晉丞相王導善藁行

虞從兄也

王恬晉中將軍會稽內史善隸書

導第二子也

王洽晉中書令領軍將軍衆書通善尤能隸行從兄羲

之云弟書遂不減吾

恬弟也

王珉晉中書令善隸行

洽少子也

王羲之晉右將軍會稽內史博精羣法特善草隸羊欣

云古今莫二

虞兄子也

王獻之晉中書令善隸藁骨勢不及父而媚趣過之

羲之

第七
子也 兄玄之徽之兄子淳之並善草行

王允之衛軍將軍會稽內史亦善草行

舒子也

太原王濛晉司徒左長史能草隸子脩瑯琊王文學善隸行與羲之善故殆窮其妙早亡未盡其美子敬每省修書云咄咄逼人

王綏晉冠軍將軍會稽內史善隸行

高平郝愔晉司空會稽內史善章草亦能隸郝超晉中

書郎亦善草

愔子也

潁川庾亮晉太尉善草行庾翼晉荊州刺史善隸行時

與羲之齊名

亮弟也

陳郡謝安晉太傅善隸行

高陽許靜民鎮軍叅軍善隸草羲之高足

晉穆帝時有張翼善學人書寫羲之表表出經日不覺後云幾欲亂真

會稽隱士謝敷胡人康昕並攻隸草

飛白本是宮殿題八分之輕者全用楷法吳時張弘好

學不仕常著烏巾時人號為張烏巾此人特善飛白能書者鮮不好之

自秦至晉凡六十九人

傳授筆法人名

蔡邕受於神人而傳之崔瑗及女文姬文姬傳之鍾繇
鍾繇傳之衛夫人衛夫人傳之王羲之王羲之傳之王
獻之王獻之傳之外甥羊欣羊欣傳之王僧虔王僧虔
傳之蕭子雲蕭子雲傳之僧智永智永傳之虞世南世
南傳之授於歐陽詢詢傳之陸柬之柬之傳之姪彥遠

彥遠傳之張旭旭傳之李陽冰陽冰傳徐浩顏真卿鄔彤韋玩崔邈凡二十有三人文傳終於此矣

僧虔答太祖書

僧虔啓恩眷罔已賜示古迹十一帙或其人可想或其法可學愛玩彌日暫得忘其沉疴輒率短見並述舊聞具如別牋民間所有帙中所無者或有不好今奉別目二十三卷追懼乖誤伏深悚息

吳大皇帝書

吳景帝書

吳歸命侯孫皓

晉安帝

亡高祖丞相導

亡曾祖領軍洽

亡從祖中書令珉

韋仲將

張芝

索靖

張翼

衛伯儒

右十二卷故州民王僧虔奉

南齊王僧虔論書

宋文帝書自謂不減王子敬時議者云天然勝羊欣功

夫不及欣

王平南廩是右軍叔自過江東右軍之前惟廩為最畫
為晉明帝師書為右軍法

亡曾祖領軍洽與右軍書云俱變古形不爾至今猶法
鍾張右軍云弟書遂不減吾

亡從祖中書令珉筆力過於子敬書舊品云有四足素
自朝操筆至暮便竟首尾如一又無誤字子敬戲云弟
書如騎驃駸駸恒欲度驂騑前

庾征西翼書少時與右軍齊名右軍後進庾猶不忿在
荊州與都下書云小兒輩乃賤家雞皆學逸少書須吾
還當比之

張翼書右軍自書表晉穆帝令翼寫題後荅右軍右軍
當時不別久方覺云小子幾欲亂真

張芝索靖韋誕鍾會二衛並得名前代古今既異無以
辨其優劣惟見筆力驚絕耳

張澄書當時亦呼有意

郝惜章草亞於右軍

晉齊王攸書京洛以為楷法

李式書右軍云是平南之流可比庾翼王濛書亦可比
庾翼

陸機書吳士書也無以較其多少

庾亮書亦能入錄

亡高祖丞相導亦甚有楷法以師鍾衛好愛無厭喪亂
狼狽猶以鍾繇尚書宣示帖衣帶過江後在右軍處右

軍借王敬仁敬仁死其母見脩平生所愛遂以入棺

郝超草書亞於二王緊媚過其父骨力不及也

桓玄書自比右軍議者未之許云可比孔琳之

謝安亦入能流殊亦自重乃為子敬書嵇中散詩得子
敬書有時裂作掇紙

羊欣丘道護並親授於子敬欣書見重一時行草尤善
正乃不稱

孔琳之書天然絕逸極有筆力規矩恐在羊欣後丘道

護與羊欣俱面授子敬故當在欣後丘殊在羊欣前
范曄與蕭思話同師羊欣然范後背叛皆失故步名亦
稍遲

蕭思話全法羊欣風流趣好殆當不減而筆力恨弱
謝靈運書乃不倫遇其合時亦得入流昔子敬上表多
於中書雜事中皆自書竊易真本相與不疑元嘉初方
就索還上謝太傅殊禮表亦是其例親聞文皇說此
謝綜書其舅云緊潔生起實為得賞至不重羊欣欣亦

憚之書法有力恨少媚好

顏騰之賀道力並便尺牘

康昕學右軍草亦欲亂真與南州識道人作右軍書貨
孔琳之書放縱快利筆道流便二王後略無其比但工
夫少自任故未得盡其妙故當劣於羊欣

謝靜謝敷並善寫經亦入能境居鍾毫之美邁古流今
是以征南還有所得辱告並五紙舉體精雋靈奧執翫
反覆不能釋手雖太傅之婉媚翫好領軍之靜述荅緒

方之茂如也昔杜度殺字甚安而筆體微瘦崔瑗筆勢甚快而結字小疎居處二者之間亦猶仲尼方於季孟也夫工欲善其事必先利其器伯喈非流紈體素不妄下筆若子邑之紙研染輝光仲將之墨一點如漆伯英之筆窮神靜思妙物遠矣邈不可追遂令思挫於弱毫數屈於陋墨言之使人於邑若三珍尚存四寶斯覲何但尺素信札動見模式將一字徑丈方寸千言也承天涼體豫復欲繕寫一賦傾遲暉采心目俱勞承閱覽秘

府備觀羣跡崔張歸美於逸少雖一代所宗僕不見前
古人之跡計亦無以過於逸少既妙盡深絕便當得之
實錄然觀前世稱目竊有疑焉崔杜之後共推張芝仲
將謂之筆聖伯玉得其筋巨山得其骨索氏自謂其書
銀鈎蠶尾談者誠得其宗劉得昇為鍾胡所師兩賢並
有肥瘦之斷元鳴獲釘壁之翫師宜致酒簡之多此亦
不能止長脗狸骨右軍以為絕倫其功不可及繇此言
之而向之論或至投杖聊呈一笑不妄言耳

鍾公之書謂之盡妙鍾有三體一曰銘石書最妙者也
二曰章程書世傳秘書教小學者也三曰行狎書行書
是也三法皆世人所善

張超字子並河間人衛覲字伯儒河東人為魏尚書僕
射謚敬侯善草及古文略盡其妙草體如傷瘦而筆跡
精殺亦行於代子瓘字伯玉晉司空太保為楚王所害
瓘採張芝草法取父書叅之更為草藁世傳其善瓘子
恒字巨山亦能書

索靖字幼安燉煌人散騎常侍張芝姊之孫也傳芝草而形異甚矜其書名其字勢曰銀鉤蠆尾

韋誕字仲將京兆人善楷書漢魏宮觀題署多是誕手魏明帝起凌雲臺先釘榜未題籠盛誕轆轤長絙引上使就榜題榜去地將二十五丈誕危懼誠子孫絕此楷法又著之家令官至鴻臚

宋王愔文字志三卷

未見此書
今錄其目

上卷目

古書有三十六種

古文

篆

大篆

象形篆

科斗篆

小篆

刻小篆

摹篆

隸書

署書

書

繆篆

鳥書

尚方篆

鳳篆

魚書

龍書

騏驎書

龜書

蛇書

仙人書

雲書

芝英書

金錯書

十二時書

垂露篆

倒薤篆

偃波篆

蚊脚篆

草書

楷書

飛書

填書

藁書

行書

古今小學

三十七家一百四十七人

書勢五家

中卷目

秦吳六十人

李斯

程邈

胡毋敬

趙高

司馬相如

張敞

嚴延年

漢元帝

史游

劉向

孔光

爰禮

楊雄

陳遵

杜林

劉睦

衛寵

劉黨

曹喜

杜度

王次仲

班固

徐幹

賈飭

賈逵

左姬

許填

唐綜

曹壽

崔寔

尹珍

羅暉

趙襲

崔瑗

皇甫規妻

蔡邕

張芝

蘇班

劉得昇

師宜官

張超

李巡

張昶

梁鵠

張紘

毛弘

左伯

姜詡

梁宣

鍾繇

張昭

蘇林

張揖

胡昭

魏武帝

邯鄲淳

衛規

杜恕

諸葛融

下卷目

魏宋六十人

韋誕

張揖

郭淮

韋熊

來敏

鍾會

皇象

何曾

傅玄

韋弘

辛曠

魏徽

諸葛瞻

楊肇

岑泉

張弘

朱育

江偉

司馬攸

陳暢

滿爽

楊經

呂悅

衛恒

衛宣

裴興

孫皓

杜預

向泰

裴邈

張柄

張越

羊忱

索靖

牽秀

羊固

辟閭訓

王導

庾翼

王濛

荀輿

王廙

李式

劉劭

王循

王裕

王羲之

衛夫人

李欽

王怡

郝愔

任靖

王獻之

李韞

張彭祖

謝安

王珣

桓玄

梁蕭子雲啟

蕭子雲自云善效鍾元常王逸少而微變字體常答勅云

臣子雲奉勅使臣寫千字文今已上呈臣昔不能拔賞
隨世所貴規模子敬多歷年所三十六著晉史一部至
二王列傳欲作論草隸法言不盡意遂不能成止論飛
白一勢而已十餘年來始見勅旨論書一卷商略筆勢
洞達字體又以逸少不及元常猶子敬不及逸少因此

研思方悟隸式始變子敬全法元常迄今以來自覺功
進此稟自天論臣先來猶恨已無臨池之勤又不叅聖
旨之興仰延明詔伏增悚息

侍中國子祭酒南徐州太守臣子雲啟上

法書要錄卷一

欽定四庫全書卷

法書要錄卷二

唐 張彥遠 撰

梁虞龢論書表

梁武帝觀鍾繇書法十有二意

梁武帝與陶隱居論書啟九首

梁庾元威論書

庾肩吾書品論

梁袁昂古今書評

陳釋智永題右軍樂毅論後

後魏江式論書表

梁中書侍郎虞穌論書表

臣聞文畫既肇文字載興六藝歸其善八體宣其妙厥後羣能間出洎乎漢魏鍾張擅美晉末二王稱英羲之書云頃尋諸名書鍾張信為絕倫其餘不足存又云吾書比之鍾張當抗行張草猶當雁行羊欣云羲之便是小推張不知獻之自謂云何欣又云張字形不及右軍

自然不如小王謝安嘗問子敬君書何如右軍荅云故
當勝安云物論殊不爾子敬荅曰世人那得知夫古質
而今妍數之常也愛妍而薄質人之情也鍾張方之二
王可謂古矣豈得無妍質之殊且二王暮年皆勝於少
父子之間又為今古子敬窮其妍妙固其宜也然優劣
既微而會美俱深故同為終古之獨絕百代之楷式桓
玄耽玩不能釋手乃撰二王紙迹雜有縑素正行之尤
美者各為一帙常置左右及南奔雖甚狼狽猶以自隨

擒獲之後莫知所在劉毅頗尚風流亦甚愛書傾意搜求及將敗大有所得廬循素善尺牘尤珍名法西南豪士咸慕其風人無長幼翕然尚之家贏金幣競遠尋求於是京師三吳之迹頗散四方義之為會稽獻之為吳興故三吳之近地偏多遺迹也又是末年適美之時中世宗室諸王尚多素嗤貴遊不甚愛好朝廷亦不搜求人間所秘往往不少新渝惠侯雅所愛重懸金招買不計貴賤而輕薄之徒銳意摹學以茅屋漏汁染變紙色

加以勞辱使類久書真偽相糅莫之能別故惠侯所蓄
多有非真然招聚既多時有佳迹如獻之吳興二牋足
為名法孝武亦纂集佳書都鄙士人多有獻奉真偽混
雜謝靈運母劉氏子敬之甥故靈運能書而特多王法
臣謝病東臯遊玩山水守拙樂靜求志林壑造次之遇
遂紆雅顧預陟泛之遊叅文咏之末其諸佳法恣意披
覽愚好既深稍有微解及臣遭遇曲沾恩誘漸漬玄猷
朝夕諮訓題勒美惡指示姪妍點畫之情昭若發蒙于

時聖慮未存草體凡諸教令必應真正小不在意則偽
謾難識事事留神則難為心力及飛龍之始戚藩告釁
方事經畧未遑研習及三年之初始玩寶迹既科簡舊
祕再詔尋求景和時所散失及乞左右嬖幸者皆原往
罪無賜其直或有頑愚不敢獻書遂失五卷多是戲學
伏惟陛下爰凝睿思淹留草法擬効漸妍賞析彌妙旬
日之間轉求精祕字之美惡書之真偽剖判體趣窮微
入神機息務閒從容研玩乃使使三吳荆湘諸境窮幽

測遠鳩集散逸及羣臣所上數月之間竒迹雲萃詔臣
與前將軍巢尚之司徒叅軍事徐希秀淮南太守孫奉
伯科簡二王書評其品題除猥錄美供御賞玩遂得遊
目瓌翰展好寶法錦質繡章爛然畢覩大凡祕藏所錄
鍾繇紙書六百九十七字張芝繆素及紙書四千八百
二十五字年代既久多是簡帖張昶繆素及紙書四千
七十字毛弘八分繆素書四千五百八十八字索靖紙
書五千七百五十五字鍾會書五紙四百六十五字是

高祖平秦川所獲以賜永嘉公主俄為第中所盜流播
始興及泰始開運地無遁寶詔龐沈搜索遂乃得之又

有范仰

一作師

恒獻上張芝縑素書三百九十八字希世

之寶潛采累紀隱迹於二王耀美於盛辰別加繕飾在
新裝二王書所錄之外絲是搨書悉用薄紙厚薄不均
輒好縐起范曄裝治卷帖小勝猶謂不精孝武使徐爰
治護隨紙長短參差不同具以數十紙為卷披視不便
不易勞茹善惡正草不相分別今所治繕悉改其弊孝

武撰子敬學書戲習十卷為帙傳云戲學而不題或真
行章草雜在一紙或重作數字或學前輩名人能書者
或有聊爾戲書既不留意亦殊猥劣徒聞則錄曾不披
簡卷小者數紙大者數十巨細差懸不相匹類是以更
裁減以二大為度亦取小王書古詩賦讚論或草或正
言無次第者入戲學部其有惡者悉皆刪去卷既調均
書又精好義之所書紫紙多是少年臨川時迹既不足
觀亦無取焉今撮書皆用大厚紙泯若一體同度翦截

皆齊又補接敗字體勢不失墨色更明凡書雖同在一
卷要有優劣今此一卷之中以好者在首下者次之中
者最後所以然者人之看書必銳於開卷懈怠於將半
既而略進次遇中品賞悅留連不覺終卷又舊書目帙
無次第諸帙中各有第一至于第十脫落散亂卷帙殊
等今各題其卷帙所在與目相應雖相涉入終無雜謬
又舊以封書紙次相隨草正混糅善惡一貫今各隨其
品不從本封條目紙行凡最字數皆使分明一毫靡遺

二王縑素書珊瑚軸二帙二十四卷紙書金軸二帙二十四卷又紙書玳瑁軸五帙五十卷皆互帙金題玉躡織成帶又有書扇二帙二卷又紙書飛白章草二帙十五卷並旃檀軸又紙書戲學一帙十二卷玳瑁軸此皆書之冠冕也自此以下別有三品書凡五十二帙五百二十卷悉旃檀軸又羊欣縑素及紙書亦選取其鈔者為十八帙一百八十卷皆漆軸而已二王新入書各裝為六帙六十卷別充備預又其中八品之餘各有條貫

足以聲華四寓價傾五都天府之名珍盛代之偉寶陛下淵昭自天觸理必鏡凡諸思制莫不鈔極乃詔張永更製御紙緊潔光麗輝日奪目又合祕墨美殊前後色如點漆一點竟紙筆則一二簡毫專用白兔大管豐毛膠漆堅密草書筆悉使長毫以利縱舍之便無使吳興郡作青石圓硯質滑而停墨殊勝南方瓦石之器縑素之工殆絕於昔王僧虔尋得其術雖不及古不減郝家所製二王書獻之始學父書正體乃不相似至於絕筆

章草殊相擬類筆迹流憚宛轉妍媚乃欲過之羲之書
在始未有奇殊不勝庾翼郝愔迨其末年乃造其極嘗
以章草答庾亮亮以示翼翼歎服因與羲之書云吾昔
有伯英章草書十紙過江亡失常痛妙迹永絕忽見足
下荅家兄書煥若神明頓還舊觀舊說羲之罷會稽住
載山下一老嫗捉十許六角竹扇出市王聊問一枚幾
錢云直二十許右軍取筆書扇扇為五字嫗大悵惋云
舉家朝餐惟仰於此何乃書壞王云但言王右軍書字

索一百入市市人競市去姚復以十數扇來請書王笑
不荅又云羲之常自書表與穆帝帝使張翼寫効一毫
不異題後荅之羲之初不覺更詳看乃歎曰小人幾欲
亂真又羲之性好鵝山陰曇一作釀村有一道士養好

鵝十餘王清旦乘小船故往意大願樂乃告求市易道
士不與百方譬說不能得道士乃言性好道久欲寫河
上公老子縑素早辦而無人能書府君若能自屈書道
德經各兩章便合羣以奉羲之便住半日為寫畢籠鵝

而歸又嘗詣一門生家設佳饌供億甚盛感之欲以書相報見有一新棐牀

一作材

几至滑淨乃書之草正相半

門生送王歸郡還家其父已刮盡生失書驚懊累日桓玄愛重書法每讌集輒出法書示賓客客有食寒具者仍以手捉書大點汚後出法書輒令客洗手兼除寒具子敬常牋與簡文十許紙題最後云民此書甚合願存之此書為桓玄所寶高祖後得以賜王武剛未審今何在謝奉起廟悉用棐材右軍取棐書之滿牀奉收得一

大簀子敬後往謝為說右軍書甚佳而密已削作數十
棊板請于敬書之亦甚合奉並珍錄奉後孫履分半與
桓玄用履為揚州主簿餘一半孫恩破會稽略以入海
羲之為會稽子敬七八歲學書羲之從後掣其筆不脫
歎曰此兒書後當有大名子敬出戲見北館新泥墜壁
白淨子敬取帚沾泥汁書方丈一字觀者如市羲之見
歎美問所作荅云七郎羲之作書與親故云子敬飛白
大有意是因於此壁也有一好事年少故作精白紗襪

著詣子敬子敬便取書之草正諸體悉備兩袖及褾畧
周年少覺王左右有凌奪之色掣械而走左右果逐之
及門外鬪爭分裂少年纔得一袖耳子敬為吳興羊欣
父不疑為烏程令欣時年十五六書已有意為子敬所
知子敬往縣入欣坐欣衣白新絹裙晝眠子敬因書其
裙幅及帶欣覺歡樂遂寶之後以上朝廷中乃零失子
敬門生以子敬書種蠶後人於蠶紙中尋取大有所得
謝安善書不重子敬每作好書必謂被賞安輒題後荅

之朝廷祕寶名書久已盈積太初狂迫乃欲一時燒除
左右懷讓者苦相譬說乃止臣見衛恒古來能書人錄
一卷時有不通今隨事改正并寫諸雜勢一卷今新裝
二王鎮書定目各六卷又羊欣書目六卷鍾張等書目
一卷文字之部備矣謹詣省上表并上錄勢新書以聞
六年九月中書侍郎臣虞龢上

梁武帝觀鍾繇書法十二意

平

謂橫也

直

謂縱也

均

謂間也

密

謂際也

鋒

謂端也

力

謂體也

輕

謂屈也

決

謂牽掣也

補

謂不足也

損

謂有餘也

巧

謂布置也

稱

謂大小也

字外之奇文所不書世之學者宗二王元常逸迹曾不
睥睨羲之有過人之論後生遂爾雷同元常謂之古肥
子敬謂之今瘦今古既殊肥瘦頗反如自省覽有異衆
說張芝鍾繇巧趣精細殆同機神肥瘦古今豈易致意
真跡雖少可得而推逸少至學鍾書勢巧形密及其獨

運意疎字緩譬猶楚音習夏不能無楚過言不悞未為
篤論又子敬之不迨逸少猶逸少之不迨元常學子敬
者如畫虎也學元常者如畫龍也余雖不習偶見其理
不習而言必慕之歟聊復自記以補其闕非欲明解強
以示物也儻有均思思盈半矣

陶隱居與梁武帝論書啟

奉旨左右中書復稍有能者惟周喜贊夫以含心之茲
實俟夾鍾吐氣今既自上體妙為下理用成工每惟申

鍾王論於天下進藝方興所恨微臣沉朽不能鑽仰高
深自懷歎慕前奉神筆三紙并今為五非但字字注目
乃畫畫抽心日覺勁媚轉不可說以讐昔歲不復相類
正此即為楷式何復多尋鍾王臣心本自敬重今者彌
增愛服俯仰悅豫不能自己啟

適復蒙給二卷伏覽標帖皆如聖旨既不顯垂允少留
不敢久停已就摹素者一段未畢不赴今信紙卷先已
經有無多他雜無所復取亦請俟俱了日奉送無此諸

書是篇章體臣今不辨復得修習惟願細書如樂毅論
太師箴例依倣以寫經傳永存真題中精要而已

梁武帝答書

近二卷欲少留差不為異紙卷是出裝書既須見前所
以付耳無正可取備於此及欲更須細書如論箴例逸
少迹無甚極細書樂毅論乃微麤健恐非真迹太師箴
小復方媚筆力過嫩書體乖異上二者已經至鑒其外
便無可付也

陶隱居又啟

樂毅論愚心近甚疑是摹而不敢輕言今旨以為非真
竊自信頗涉有悟箴咏吟贊過為淪弱許靜素段遂蒙
永給仰銘矜獎益無喻心此書雖不在法例而致用理
均背間細楷蕪復兩翫先於都下偶得飛白一卷云是
逸少好迹臣不嘗別見無以能辨惟覺勢力驚絕謹以
上呈於臣非用脫可充閣願仍以奉上臣昔於馬澄處
見逸少正書目錄一卷澄云右軍勸進洛神賦諸書十

餘首皆作今體惟急就篇二卷古法緊細近脫憶此語
當是零落已不復存澄又云帖注出裝者皆擬賚諸王
及朝士臣近見三卷首帖亦謂久已分本不敢議此正
復希於三卷中一兩條更得預出裝之例耳天旨遂復
頓給完卷下情益深悚息近初見卷題云第二十三四
已欣其多今者賜書卷第遂至二百七十惋訝無已天
府如海非一瓶所汲量用息心前後都已蒙見大小五
卷於野拙之分實已過幸若非殊恩豈可觖望愚固本

博涉而不能精昔患無書可看乃願作主書令史晚愛
隸法又羨典掌之人常言人生數紀之內識解不能周
流天壤區區惟充恣五欲實可恥愧每以為得作才鬼
亦當勝於頑仙至今猶然始欲翻然之自無射以後國
政方殷山心蕪默不敢復以閒虛塵觸謹於此題事故
遂成煩黷伏願聖慈照錄誠懽

梁武帝又荅書

又省別疏云故當宜微以著賞此既勝事風訓非嫌云

云然則所習聊試畧言夫運筆邪則無芒角執手寬則書緩弱點掣短則法擁腫點掣長則法離澌畫促則字勢橫畫疎則字形慢拘則乏勢放又少則純骨無媚純肉無力少墨浮澀多墨笨鈍比並皆然任意所之自然之理也若抑揚得所趣舍無違值筆廉斷觸勢峯鬱揚波折節中規中矩分間下注濃纖有方肥瘦相和骨力相稱婉婉曖曖視之不足稜稜凜凜常有生氣適眼合心便為甲科衆家可識亦當復繇串耳六文可工亦當

復繇習耳一聞能持一見能記且古且今不無其人大抵為論終歸是習程邈所以能變書體為之舊也張芝所以能善書工學之積也既舊既積方可以肆其談吾少來乃至不啻畫甲子無論於篇紙老而言之亦復何謂正足見嗤於當今貽笑於後代遂有獨冠之言覽之背熟隱真於是乎累真矣此直一藝之工非吾所謂勝事此道心之塵非吾所謂無欲也

陶隱居又啓

二卷中有雜迹謹疏注如別恐未允愚衷并竊所摹者亦以上呈近十餘日情慮悚悸無寧涉事遂至淹替不宜復待填畢餘條並非用惟叔夜威輦二篇是經書體式追以單郭為恨伏按卷上第數甚為不少前旨惟有四卷此書似是宋元嘉中撰集當繇自後多致散失逸少有名之迹不過數首黃庭勸進像讚洛神此等不審猶得存不

第二十三卷

今見有十二條在別紙

按此卷是右軍書者惟有八

條前樂毅論書乃極勁利而非甚用意故頗有壞字太
師箴大雅吟用意甚至而更成小拘束乃是書扇題屏
風好體其餘五片無的可稱臣濤言一紙此書乃不惡而非右軍父
子不識誰人給事黃門一紙治庶瀝一紙凡二篇並是謝安衛軍參
迹又似是摹軍任靖書後又治庶瀝狸骨方一紙是子敬書亦似摹迹右四條非右

軍書

二十四卷

今見有二十一條在

按此卷是右軍書者惟有十一條

並非甚合迹蕪多漫抹於摹處難復委曲前黃初三年

一紙是後人學右軍繆襲告墓文一紙是許先生書抱憂懷痛一紙

是張澄書五月十一日一紙是摹王琬書被油尚想黃綺一紙遂結

滯一紙凡二篇並後人所學甚拙惡不復展一紙是子敬書便復改月一

紙是張翼書五月十五日繇白一紙亦是王琬書治欬方一紙是謝

安書右一十條非右軍書伏恐未垂許以區別今謹上許

先生書任靖書如別比方即可知王琬張澄謝安張翼

書公家應有

梁武帝又答書

省區別諸書良有精賞所異所未可知悉可不耳
給事黃門二紙為任靖書觀其送靖書諸字相附近彼
二紙靖書體解離便當非靖書要復當以點畫波擊論
極諸家之致此亦非可倉卒運於毫楮且保拙守中也
許任二迹并摹者並付及右三紙正書二十六日至嗣
公

陶隱居又啟

啟伏覽書用前意雖止二六而規矩必周後字不出二

百亦褒貶大備一言以蔽便書情頓極使元常老骨更蒙榮造子敬懦肌不沉泉夜逸少得進退其間則玉科顯然可觀若非聖證品析恐愛附近習之風永遂淪迷矣伯英既稱草聖元常實自隸絕論旨所謂殆同璿璣神寶曠世以來莫繼斯理既明諸畫虎之徒當日就輟筆反古歸真方弘盛世愚管見預聞喜佩無屈比世皆高尚子敬子敬元常繼以齊名貴斯式略海內非惟不復知有元常於逸少亦然非排斥所可溷而無緇不過數

紙今奉此論自舞自蹈未足逞泄日月願以所摹竊示
洪遠思曠此二人皆是均思者必當贊仰踴躍有盈半
之益臣與洪遠雖不相識從子詡以學業往來故因之
有會但既在閣恐或以應聞知摹者所採字大小不甚
均調熟看乃尚可恐竟意大殊此篇方傳千載故宜令
迹隨名偕老益增美晚所奉三旨伏循字迹大覺勁密
竊恐既以言發意則應言而新手隨意運筆與手會故
意得諧稱下情歡仰寶奉愈至世論咸云江東無復鍾

迹常以歎息比日竚望中原廓清太丘之碑可就摹採
今論旨云真迹雖少可得而推是猶有存者不審可復
幾字既無出見理冒願得工人摹填數行脫蒙見此實
為過幸又逸少學鍾勢巧形密勝於自運不審此例復
有幾紙垂旨以黃庭像讚等諸文可更有出給理自運
之迹今不復希請學鍾法仰惟殊恩

梁武帝又荅書

鍾書乃有一卷傳以為真意謂悉是摹學多不足論有

兩三行許似摹微得鍾體逸少學鍾的可知近有二十
許首此外字細畫短多是鍾法今始欲令人帖裝未便
得付來月日有竟者當遣送也

陶隱居又啟

逸少自吳興以前諸書猶為未稱凡厥好迹皆是向在
會稽時永和十許年中者從失郡告靈不仕以後略不
復自書皆使此一人世中不能別也見其緩異呼為末
年書逸少亡後子敬年十七八全放此人書故遂成與

之相似今聖旨標題足使衆識頓悟於逸少無復末年之譏阮研近聞有一人學研書遂不復可別臣比郭摹所得雖粗寫字形而無復其用筆迹勢不審前後諸卷一兩條謹密者可得在出裝之例復蒙垂給至年末間不此澤自天直以啟審非敢必覲

梁庾元威論書

所學正書宜以殷鈞范懷約為主方正循紀修短合度所學草書宜以張融王僧虔為則體用得法意氣有餘

章表牋書於斯足矣夫才能則闕性分耽嗜殊妨大業
但令緊快分明屬辭流便字不須體語輒投聲若以已
已莫分東東相亂則兩王妙迹二陸高才頃來非所用
也王延之有言曰勿欺數行尺牘即表三種人身豈非
一者學書得法二者作字得體三者輕重得宜意謂猶
須言無虛出斯則善矣近何令貴隔勢傾朝野聊爾疎
漏遂遭十穢之書今聊存兩事書曰有寒士自陳簡於
掌選詩云伎能自寡薄支葉復單貧柯條濫垂景木石

詎知晨狗馬雖難畫犬羊誠易馴効嘖終未似學步豈
如真寔云亂朝緒是曰黷彝倫俗作於茲混人迹自此
訖離合之詩由來久矣不知譏剝爰加稱贊是其第六
穢也近來貴宰於二品清宦進不假手作書而筆迹過
鄙無法度彼恭拜忽云永感荅人借車還白不具真本
流傳合朝恥辱是其第七穢也以此而言書何容易且
梁制與平吉人牋書有增懷語者不得荅書許乃告絕
私弔荅中彼此言感恩乖錯者州望須刺大中正處人

清議終身不得仕盛名年少宜留意勉之余見學阮研
書者不得其骨力婉媚唯學攣拳委盡學薄紹之書者
不得其批研淵微徒自經營嶮急晚途別法貪省愛異
濃頭纖尾斷腰頓足一八相似十小難分屈等如勾變
前為草咸言祖述王蕭無妨日有訛謬星不從生籍不
從來許慎門徒居然喁喁衛恒子弟寧不傷嗟註誤衆
家豈宜改習書字之興繇來尚矣沮誦蒼頡黃帝史也
周宣王時柱下史史籀始著籀書今六八之法雖存十

五之篇亡矣及秦相李斯破大篆為小篆造蒼頡七章
中車府令趙高造爰歷六章太史胡毋敬造博學七章
後人分五十五章為三蒼上卷至哀帝元嘉中楊子雲
作訓纂記滂喜為中卷和帝永元中賈升郎更續記彥
音盤均為下卷皆是記字字出衙人故人稱為三蒼也夫
蒼雅之學儒博所宗自景純注解轉加敦尚漢晉正史
及古今字書並云蒼頡九篇是李斯所作今竊尋思必
不如是其第九章論狝信京劉等郭云狝信是陳狝韓

信京劉是大漢西土是長安此非識言豈有秦時朝宰
談漢家人物牛頭馬腹先達何以安之江左碩儒相係
梁初復有任昉及沈約悉未有譏駁余忽橫議實不自
許敬侯明哲定其可否而字韻集方言廣雅凡錄字者
十有四家許慎穿鑿賈氏乃奏說文曹厯開拓許侯爰
成字苑說文則形聲具舉字苑則品類周悉追悟典墳
字弗全體周禮以雞斯為筭纒禮記以相近為禳祈致
令眾議叢殘音辭騷耳蓋繇程邈變隸流傳未一鄭公

詩譜頗顯其源且書文一反草木相從凡五百六十七部合一萬五千九百一十五字即曰世中所行十分裁一而今點畫失體深成怪也近有居士阮孝緒撰古今文字三卷窮搜正典次丹陽五官丘陵撰文字指要二卷精加撻發惟此兩書可稱要用余少值明師留心字法所以坐右作午量字不依義獻妙跡不逐陶葛名方作純羹不數晉書不循韻集爰以淺見輕述字府自謂此文或均螢露齊末王融圖古今雜體有六十四書少

年崇放家藏紙貴而鳳魚蟲鳥是七國時書元常皆作
隸書故貽後來所詰湘東王遣沮陽令韋仲定為九十
一種次功曹謝善勛增其九法合成百體其中以八卦
書為一以太為兩法徑丈一字方寸千言大上止傳可
爾鬼書惟有業殺刁斗出於古器今尋繇乎內典散隸
露書終是飛白意謂此等並非通論今所不取余經為
正階侯書十牒屏風作百體間以朱墨當時衆所驚異
自爾絕筆惟留草本而已其百體者懸針書垂露書秦

望書汲冢書金鵲書玉文書鵠頭書虎爪書倒薤書偃
波書幡信書飛白篆古頑書籀文書奇字繆篆制書列
書日書月書風書雲書星隸填隸蟲食葉書科斗書署
書胡書蓬書相書天竺書轉宿書一筆篆飛白書一筆
隸飛白草古文隸橫書楷書小科隸此五十種皆純墨
壘文書節文書真文書符文書芝英隸花草隸幡信隸
鍾鼓隸鍾鼓隸釋
作鍾鼎龍虎篆鳳魚篆麒麟篆仙人篆科斗
蟲篆雲篆蟲篆魚篆鳥篆龍篆龜篆虎篆鸞篆龍虎隸

鳳魚隸麒麟隸仙人隸科斗隸雲隸蟲隸魚隸鳥隸龍
隸龜隸鸞隸蛇龍文隸書龜文書鼠書牛書虎書兔書
龍草書蛇草書馬書羊書猴書鷄書犬書豕書此十二
時書已上五十種皆采色其外復有大篆小篆銘鼎摹
印刻符石經象形篇章震書到書反左書等及宋中庶
宗炳出九體書所謂縑素書簡奏書牋表書弔記書行
狎書檄書藁書半草書全草書此九法極真草書之次
第焉刪捨之外所存猶一百二十體張芝始作一筆飛

白書此於井冊等字為鈔所以唯云一筆飛白書則無所不通矣反左書者大同中東宮學士孔敬通所創余見而達之於是座上酬荅諸君無有識者遂呼為衆中清閒法今學者稍多解者益寡敬通又能一筆草書一行一斷婉約流利特出天性頃來莫有繼者宗炳又造畫瑞應圖千古卓絕王元長頗加增定乃有虞舜獬廌周穆駿猊漢武神鳳衛君舞鶴五城九井螺杯魚硯金滕王英玄圭朱草等凡二百一十物余經取其善草嘉

禾靈禽瑞獸樓臺器服可為翫對者盈縮其形狀叅詳其動植制一部焉此乃青出於藍而實世中未有復於屏風上作雜體篆二十四種寫凡百名將恐一筆鄣子凡百屏風傳者逾謬併懷歎息世本云史皇作圖黃帝臣也其唐虞之文章夏后之鼎象則圖畫之宗焉其後繪事逾精丹青轉妙乃有釘女心痛圖魚獺集敬君以之亡婦王嬙繇此失身近代陸綏足稱畫聖所聞談者一筆之外僅可蟬雀顧長康稱為三絕終是半癡人耳

雜體既資於畫所以附乎書末

梁庾肩吾書品論

玄靜先生曰予遍求邃古逖訪厥初書名起於玄洛字
勢發於倉史故遣結繩取諸文象諸形會諸人事未有
廣此緘滕深茲文契是以一畫加大天尊可知二力增
土地卑可審日以君道則字勢圓月以臣輔則文體缺
及其轉注假借之流指事會意之類莫不狀範毫端形
呈字表開篇翫古則千載共朝削簡傳今則萬里對面

記善則惡自削書賢則過必改玉歷頌正而化俗帝載
陳言而設教變通不極日用無窮與聖同功參神並運
爰洎中葉捨繁從省漸失潁川之言竟逐雲陽之字若
乃鳥跡孕於古文壁書存於科斗符陳帝璽摹調蜀漆
署表宮門銘題禮器魚猶捨鳳鳥已分蟲仁義起於麒
麟威形發於龍虎雲氣時飄五色仙人還作兩童龜若
浮溪蛇如赴穴流星疑燭垂露似珠芝英轉車飛白掩
素參差倒薤既思種柳之謠長短懸針復想定情之製

蚊脚傍低鵠頭仰立填飄板上繆起印中波回墮鏡之
鸞楷顧雕陵之鵲並以篆籀重復見重昔時或巧能售
酒或妙令鬼哭信無味之奇珍非趣時之急務且具錄
前訓今不復無論惟草正疎通專行於世其或繼之者
雖百代可知尋隸體發源秦時隸人下邳程邈所作始
皇見而重之以奏事繁多篆字難製遂作此法故曰隸
書今時正書是也草勢起於漢時解散隸法用以赴急
本因草創之義故曰草書建初中京兆杜操始以善草

知名今之草書是也余自少迄長留心茲藝敏手謝於
臨池銳意同於削板而蕺山之扇竟未增錢凌雲之臺
無因誠子求諸故迹或有淺深輒刪善草隸者一百二
十八人伯英以稱聖居首法高以追駿處末推能相越
小例而九引類相附大等而三復為略論總名書品

張芝

伯英

鍾繇

元常

王羲之

逸少

右三人上之上

論曰隸既發源秦史草乃激流齊相跨七代而彌遵將
千載而無革誠開博者也均其文總六書之要指其事
籠八體之奇能拔篆籀於繁蕪移楷真於重密分行紙
上類出蛭之蛾結畫篇中似聞琴之鶴峰嶠間起瓊山
慙其斂霧漪瀾遞振碧海愧其下風抽絲散水定其下
筆倚刀欠尺驗於成字真草既分於星芒烈火復成於
珠佩或橫牽豎掣或濃點輕拂或將放而更留或因挑
而還直敏思藏於胸中巧意發於毫銛詹君端策故以

迷其變化英韶傾耳無以察其音聲殆善射之不注鈔
斲輪之不傳是以鷹爪含利出彼兔毫龍管潤霜遊茲
蠶尾學者鮮能具體窺者罕得其門若探鈔測深盡形
得勢烟華落紙將動風彩帶字欲飛疑神化之所為非
人世之所學惟張有道鍾元常王右軍其人也張工夫
第一天然次之衣帛先書稱為草聖鍾天然第一工夫
次之鈔盡許昌之碑窮極鄴下之牘王工夫不及張天
然過之天然不及鍾工夫過之羊欣云貴越羣品古今

莫二無撮衆法備成一家若孔門以書三子入室矣允
為上之上

崔瑗

子玉

杜度

伯度

師宜官

張昶

文舒

王獻之

子敬

右五人上之中

論曰崔子玉擅名北中跡罕南度世有得其摹者王子
敬見之稱美以為功類伯英杜度濫觴於草書取奇於

漢帝詔復奏事皆作草書師宜官鴻都為最能大能小
文舒聲劣於兄時云亞聖子敬泥帚早驗天骨兼以掣
筆復識人工一字不遺兩葉傳抄此五人允為上之中

索靖

幼安

梁鵠

孟皇

韋誕

仲將

皇象

休明

胡昭

孔明

鍾會

士季

衛瓘

伯玉

荀爽

長眉

阮研

文幾

右九人上之下

論曰幼安斂蔓舅氏抗名衛令孟皇功盡筆力字入帳
中仲將不妄染毫湏張筆左紙孔明動見模楷所為胡
肥而鍾瘦休明斟酌二家駢駕八絕士季之範元常猶
子敬之稟逸少而功拙無効真草皆成伯玉遠慕張芝
近叅父迹長脗狸骨方擬而難追阮研居今觀古盡窺
眾妙之門雖復師王祖鍾終成別構一體此九人允為
上之下

張超

子並

郭伯道

劉德昇

君嗣

崔寔

子真

衛夫人

茂猗

李式

景則

庾翼

稚恭

郝愔

方回

謝安

安石

王珣

季琰

桓玄

敬道

羊欣

敬元

王僧虔

孔琳之

彦琳

殷鈞

右十五人中之上

論曰子並崔家州里頗相倣効可謂醬鹹於鹽冰寒於水伯道里居朝廷遠討其迹德昇之妙鍾胡各採其美子真俊才門法不墜李妻衛氏自出華宗景則毫素流靡稚恭聲彩邁越郝惜安石草正並驅季琰桓玄筋力俱駿羊欣早隨子敬最得王體孔琳之聲高宋氏王僧虔雄發齊代殷鈞頗耽著愛好終得肩隨此一十五人允為中之上

魏武帝

曹操
孟德

孫皓

吳主
元宗

衛覲

伯儒

左子邑

伯宇
子邑

衛恒

巨山

杜預

元凱

王廙

世將

張彭祖

任靖

韋昶

文休

王修

敬仁

張永

范懷約

吳休尚

施方泰

右十五人中之中

論曰魏帝筆墨雄贍吳主體裁綿密伯儒兼叙隸草子
邑分鑣梁邯巨山三世元凱累葉王廙為右軍之師彭
祖取羲之之道任靖矯名文休題柱敬仁清舉致畏逼
之詞張范遞時俱東南之美施吳鄴下同年後萃此十
五人允為中之中

羅暉

叔景

趙襲

元嗣

劉輿

張昭

陸機

士衡

朱誕

王導

庾亮

元規

王洽

敬和

郝超

景興

張翼

宋文帝

姓劉名義隆

康昕

徐希秀

謝朓

玄暉

劉繪

陶隱居

名弘景字通明

王崇素

右十八人中之下

論曰叔景元嗣並稱四州劉興之筆札張昭之無懈陸
機以弘才掩迹朱誕以偏藝流聲王導則列聖推能庾
亮則羣公挹功王洽以下並通諸法郝超以晚年取譽
張翼善効宋帝康昕希秀孤生謝朓劉繪文宗書範近
來少前陶隱居仙才翰彩狀於山谷王崇素繪靡篇書
筆傳於里閭此十八人允為中之下

姜詡

梁宣

魏徵

玄成

韋秀

鍾輿

向泰

羊忱

晉元帝

景文

識道人

范曄

蔚宗

宋炳

謝靈運

蕭思話

薄紹之

敬叔

齊高帝

庾黔婁

費元瑤

孫奉伯

王薈

羊祜

叔子

右二十人下之上

論曰此二十人並擅毫翰動成楷則殆逼前良見希後
彥允為下之上

楊經

諸葛融

楊潭

張炳

岑淵

張興

王濟

李夫人

劉穆之

道和

朱齡石

庾景休

張融

思光

褚元明

孔敬通

王籍

文海

右十五人下之中

論曰此十五人雖未窮字奧書尚文情披其蘊薄非無
香草視其涯岸皆有潤珠故遺斯紙以為世玩允為下
之中

衛宣

李韞

陳基

傅廷堅

張紹

陰光

韋熊

張暢

曹任

宋嘉

裴邈

羊固

傅夫人

辟閭訓

謝晦

徐羨之

孔閭

顏寶光

周仁皓

張欣泰

張熾

僧岳道人

法高道人

右二十三人下之下

論曰此二十三人皆五味一和五色一彩視其雕文非
特刻鵠人人下筆寧止追嚮遺迹見珍餘芳可折誠以
驅馳並駕不逮前鋒而中權後殿各盡其美允為下之
下

今以九例該此衆賢猶如玄圃積玉炎洲聚桂其中實相推謝故有茲多品然終能振此鱗翼俱上龍門儻後之學者更隨點曝云爾

袁昂古今書評

王右軍書如謝家子弟縱復不端正者爽爽有一種風氣

王子敬書如河洛間少年雖有充悅而舉體沓拖殊不可耐

羊欣書如大家婢為夫人雖處其位而舉止羞澀終不似真

徐淮南書如南岡士大夫徒好尚風範終不免寒乞

阮研書如貴胄失品次叢悴不復排突英賢

王儀同書如晉安帝非不處尊位而都無神明

施肩吾書如新亭偃父一往見似揚州人共語便音態出

陶隱居書如吳興小兒形容雖未成長而骨體甚駿快

殷鈞書如高麗使人抗浪甚有意氣滋韻終乏精味

袁崧書如深山道士見人便欲退縮

蕭子雲書如上林春花遠近瞻望無處不發

曹喜書如經論道人言不可絕

崔子玉書如危峰阻日孤松一枝有絕望之意

師宜官書如鵬羽未息翩翩自逝

韋誕書如龍威虎振劍拔弩張

蔡邕書骨氣洞達爽爽有神

鍾司徒書字十二種意意外殊妙實亦多奇

邯鄲淳書應規八矩方圓乃成

張伯英書如漢武帝愛道憑虛欲仙

索靖書如飄風忽舉驚鳥乍飛

梁鵠書如太祖忘寢觀之喪目

皇象書如歌聲繞梁琴人捨徽

衛恒書如插花美女舞笑鏡臺

孟光祿書如崩崖人見可畏

李斯書世為冠蓋不易施平

張芝經奇鍾繇特絕逸少鼎能獻之冠世四賢共類洪
芳不減羊真孔草蕭行范篆各一時絕妙

右二十五人自古及今皆善能書奉勅遣臣評古今書
臣既愚短豈敢輒量江海但聖旨委臣斟酌是非謹品
字法如前伏願照覽謹啓普通四年二月五日內侍中
尚書令袁昂啟

勅旨具之如卿所評臣謂鍾繇書意氣密麗若飛鴻戲

海舞鶴遊天行間茂密實亦難過蕭思話書走墨連綿
字勢屈強若龍跳天門虎卧鳳閣薄紹之書字勢蹉跎
如舞女低腰仙人嘯樹乃至揮毫振紙有疾閃飛動之
勢臣淺見無聞暗於明滅寧敢謬量山海以聖命自天
不得斟酌過失是非如獲湯炭

智永題右軍樂毅論後

樂毅論者正書第一梁世模出天下珍之自蕭阮之流
莫不臨學陳天嘉中人得以獻文帝帝賜始興王王作

牧境中即以見示吾昔聞其妙今覩其真閱翫良久匪
朝伊夕始興薨後仍屬廢帝廢帝既歿又屬餘杭公主
公主以帝王所重恒加寶愛陳世諸王皆求不得及天
下一統四海同文處處追尋累載方得此書留意運工
特盡神妙其間書誤兩字不欲點除遂雌黃治定然後
用筆陶隱居云大雅吟樂毅論太師箴等筆力鮮媚紙
墨精新斯言得之矣釋智永記

後魏江式論書表

臣聞庖犧氏作而八卦列其畫軒轅氏興而靈龜彰其
彩古史倉頡覽二象之文觀鳥獸之跡別創文字以代
結繩用書契以紀事宣之王庭則百工以敘載之方冊
則萬品以明迄于三代厥體頗異雖依類取制未能悉
殊倉氏矣故周禮八歲入小學保氏教國子以六書一
曰指事二曰象聲三曰象形四曰會意五曰轉注六曰
假借蓋倉頡之遺法也及宣王太史籀著大篆十五篇
與古文或同或異時人即謂之籀書孔子修六經左丘

明述春秋皆以古文厥意可得而言其後七國殊軌文字乖別暨秦兼天下丞相李斯乃奏罷不合秦文者斯作倉頡篇中車府令趙高作爰歷篇太史胡毋敬作博學篇皆取史籀大篆或頗省改所謂小篆者也於是秦燒經書滌除舊典官獄繁多以趨約易始用隸書古文由此息矣隸書者始皇時衙吏下邳程邈附於小篆所作也世人以邈徒隸即謂之隸書故秦有八體一曰大篆二曰小篆三曰刻符書四曰蟲書五曰摹印六曰署

書七曰及書八曰隸書漢興有尉律學復教以籀書又習以八體試之課最以為尚書史書或有字不正輒舉劾焉又有草書莫知誰始考其形畫雖無厥誼亦是一時之變通也孝宣時召通倉頡篇者張敞從受之涼州刺史杜鄴沛人爰禮講學大夫秦近亦能言之孝平時徵禮等百餘人說文字於未央以禮為小學元士黃門侍郎楊雄採以作訓纂篇及亡新居攝自以運應制作使大司空甄豐校文字之部頗改定古文時有六書一

曰古文孔子壁中書也二曰奇字即古文而異者三曰篆書云小篆也四曰佐書秦隸書也五曰繆篆所以摹印也六曰鳥蟲所以書幡信也壁中書者魯共王壞孔子宅而得尚書春秋論語孝經也又北平侯張蒼獻春秋左氏傳書體與孔氏壁中書又類即前代之古文矣後漢郎中扶風曹喜號曰工篆小異斯法而甚精巧自是後學皆其法也又詔侍中賈逵修理舊文殊藝異術王教一端苟有可以加於國者靡不悉集逵即汝南許

慎古學之師也後慎嗟時人之好奇歎俗儒之穿鑿惋
文毀於凡譽痛字敗於庸說詭更任情變亂於世故撰
說文解字十五篇首一終亥各有部居苞括六藝羣書
之詁評釋百代諸子之訓天地山川草木鳥獸昆蟲雜
物奇怪珍異王制禮儀世間人事莫不畢載可謂類聚
羣分雜而不越文質彬彬最可得而論也左中郎將陳
留蔡邕採李斯曹喜之法為古今雜形詔於太學立石
碑刊載五經題書楷法多是邕書也後開鴻都書盡其

能莫不雲集于時諸方獻篆無出邕者魏初博士清河張揖著埤倉廣雅古今字詁究諸埤廣綴拾遺漏增長事類抑亦於文為益者也然其字詁方之許篇古今體用或得或失矣陳留邯鄲淳亦與揖同時博開古藝特善倉雅許氏字指八體六書精究閑理有名於揖以書教諸皇子又建三字石經於漢碑之西其文蔚煥三體復宣校之說文篆隸大同而古字少異又有京兆韋誕河東衛覲二家並號能篆當時樓觀榜題寶器之銘悉

是誕書咸傳之子孫世稱其妙晉世義陽王典詞令任
誠吕忱表上字林六卷尋其况趣附託許慎說文而按
偶章句隱別古籀奇惑之字文得正隸不差篆意忱弟
靜別倣故左校令李登聲類之法作韻集五卷使宮商
角徵羽各為一篇而文字與兄便是魯衛音讀楚夏時
有不同皇魏承百王之季紹五運之緒世易風移文字
改變篆形謬錯隸體失真俗學鄙習復加虛造巧談辯
士以意為疑炫惑於時難以釐改傳曰以衆非非行正

言信哉得之於斯情矣乃曰追來為歸巧言為辯小兔
為駟神蟲為蠶如斯甚眾皆不合孔氏古書史籀大篆
許氏說文石經三字也凡所開卷莫不惆悵為之咨嗟
夫文字者六藝之宗王教之始前人所以垂後今人所
以識古故曰本立而道生孔子曰必也正名又曰述而
不作書曰予欲觀古人之象皆言遵循舊文而不敢穿
鑿也臣六世祖瓊家世陳留往晉之初與從父應元俱
受學於衛覬古篆之法埤倉雅言說文之誼當時並收

善譽而祖至太子洗馬出為馮翊郡值洛陽之亂避地河西數世傳習斯業所以不墜世祖太延中皇風西被牧捷內附臣亡祖文威杖策歸國奉獻五世傳掌之書古篆八體之法時蒙褒錄叙列於儒林官班文省家號世業暨臣闇短識學庸薄漸漬家風有忝無顯但逢時來恩出願外得承澤雲津側霑漏潤驅馳文閣參預史官題篆宮禁猥同上哲既竭愚短欲罷不能是以敢藉六世之資奉遵祖考之訓竊慕古人之軌企踐儒門之

輒輒求撰集古來文字以許慎說文為主爰採孔氏尚書五經音注篇篇爾雅三倉凡將方言通俗文字埤倉廣雅古今字詁三字石經字林韻集諸賦文字有六書之誼者以類編聯文無重複統為一部其古籀奇字俗隸諸體咸使班於篆下各有區別詁訓假借之誼各隨文而解音讀楚夏之聲並逐字而注其所不知者則闕如也脫蒙許翼省百氏之觀而周文字之域典書秘書所須之書乞垂勅給付並學士五人嘗習文字者助

臣披覽書生五人專令招寫付中書黃門國子祭酒一
月一監評議疑隱庶無訛謬所撰名目伏聽明旨詔曰
可如所請并就太常兼教八分書史也其有所須依請
給之名目待書成重聞式於是撰集字書號曰古今文
字凡四十篇大體依許氏為本上篆下隸

法書要錄卷二

欽定四庫全書

子部

法書要錄卷三

詳校官中書

臣王鵬

檢討

臣德生覆勘

覆校官主事

臣李駿

校對官主事

臣張培

謄錄監生

臣陸費鑒

欽定四庫全書卷

法書要錄卷三

唐張彥遠撰

唐虞世南書旨述

唐褚遂良右軍書目

李嗣真後書品

武平一徐氏法書記

徐浩論書

徐浩古跡記

何延之蘭亭記

褚遂良搨本樂毅論記

崔備壁書飛白蕭字記

李約壁書飛白蕭字贊

大父相國高平公蕭齋記

蔡惲書無定體論

不錄

唐虞世南書旨述

客有通玄先生好求古迹為余知書啟之發源審以臧

否曰予不敏何足以知之今率以聞見隨紀年代考究興亡其可為元龜者舉而敘之

古者畫卦立象造字設教爰寘形象肇乎蒼史仰觀俯察鳥跡垂文至于唐虞煥乎文章暢於夏殷備乎秦漢洎周宣王史史籀循科斗之書採蒼頡古文綜其遺美別署新意號曰籀文或謂大篆秦丞相李斯改省籀文適時簡要號曰小篆善而行之其蒼頡象形傳諸典策世絕其跡無得而稱其籀文小篆自周秦以來猶或叅

用未之廢黜或刻於符璽或銘於鼎鍾或書之旌鉞往
往人間時有見者夫言篆者傳也書者如也述事契誓
者也字者孳也孳乳寢多者也而根之所由其來遠矣
先生曰古文籀篆曲盡而知之愧無隱焉隸草攸止今
則未聞願以發明用祛昏惑曰至若程邈隸體因之罪
隸以明其書朴畧微而歷褻增損亟以湮淪而淳善之
流亦稱傳習首變其法巧拙相沿未之超絕史游制於
急就創立草藁而不之能崔杜析理雖則豐妍潤色之

中失於簡約伯英重以省繁飾之銛利加之奮逸時言
草聖首出常倫鍾太傅師資德昇馳騫曹蔡倣學而致
一體真楷獨得精妍而前輩數賢遞相矛盾事則恭守
無捨儀則尚有瑕疵失之斷割逮乎王廙王洽逸少子
敬剖析前古無所不工八體六文必揆其理俯於衆美
會滋簡易制成今體乃窮奧旨先生曰於戲三才審位
日月燭明固資異人一數而化不然者何以臻妙無相
奪倫父子聯鑣軌範後昆先生曰書法玄微其難品繪

今之優劣神用無方小學疑迷惕然將寤而旨述之義其可聞乎曰無讓繁詞敢以終序

晉右軍王羲之書目

正書行書

褚遂良撰

正書都五卷

共四十帖

第一樂毅論

四十四行書付官奴

第二黃庭經

六十行與山陰道士

第三東方朔贊

書與王循

第四周公東征

十一行

年月日朔小字

十四行自誓文

尚想黃綺

七
墓田丙舍
五
行

第五義之死罪前因李叔夷

四

瑯邪臨沂

三

義之頓首

頓首一日相省

四

行三一之法

四

尚書宣示孫權所

求

八

臣言瑯琊新廟

四

晉侯侈

六

草書都五十八卷

第一永和九年

二十八

行
蘭亭序

纏利害

二十

二行

第二爰有猗人

九

庾新婦

五

九月二十三日義之八日

書

八

十一月七日義之報知少麋

五

十二月六日義

之報一昨因暨主簿書

行六

臣羲之言伏惟皇太后

行七

臣羲之言嚴寒不審

行四

臣羲之言伏惟陛下

行五

雨涼

佳得書

行五

問庶子哀摧

行四

第三

關

第四七月二十五日羲之頓首期晚生不有

行六

五月二

十四日羲之頓首二旬哀悼行羲之報曹妹

行五

羲之

頓首違遠亡嫂積年

行八

昨殊不散

行三

殷中軍奄忽哭

之

行三

第五義之死罪亡兄靈柩

行七

五月七日義之頓首頓首

昨便斬草亡嫂尚停此

行十

期小女四歲暴疾不救

行五

秋中諸感切懷

行五

第六義之白不審尊體比復如何

行五

得示慰吾頻以服

散

行三

二十三日發至長安

行八

義之死罪不審何定尚

扶持

行四

適遠告承如常

行五

第七義之頓首舅天歿

行四

義之頓首奄承遘難

行五

義之

頓首君眼目

行五

六月十五日義之頓首大行皇帝崩

四
行 大行皇帝 五
月半增感傷奈何 四
行

第八謝新婦春日感傷 七
義之死罪無亦永往 七
行 謝范

新婦得富春還疏 十
行 向書至也須君至射堂 四
行

第九五月二十七日州民王義之死罪比夏交 十一
義

之死罪荀葛各一國佐命之宗 十七
行 君須復以何散

懷 七
行

第十七月十三日告離得兄弟 五
行 延期官奴小女 七
行 不

圖禍痛乃將至此 二
行 日月如馳嬖棄背 五
行 近遣書

想即至

行二

比書慰也汝不可

行六

第十一義之頓首快雪時晴

行六

未復知問晴快即轉勝

行七

去血有損不堪耿

行三

月行復半痛傷兼摧

行三

第十二六月十七日告循紀

行四

柳匏比問賊足下猶

行五

未佳

行四

義之頓首卿佳不家中猶爾

行八

第十三遍熱既安一旦盛農

行五

知齡家祖可悲慰

行九

下多日不復意問

行十

晚復熱想足下

行八

第十四都下二十六日書云中郎

行五

近絕不得新婦諸

叔問

行十

九月十七日義之報且行因孔侍中

行八既逼

近羸劣

行六

第十五想大小悉佳

行十

謝新婦賢從弟

行八

隔日不知問

二旬哀傷

行七

第十六省書知定疑來

二十行六

痛惜敬和寢息在心

行九

羣

從彫落將盡

行十

第十七報恒何如

七行有一帖云義之報恒何如

二月二日汝歸母

行二

雖問和篤疾

十一行

此粗平安

第十八二十二日義之報近得書行五毒熱瘡斲未甚耿

耿行五足下可不吾眼少劣行四再昔來熱如小有覺行十

第十九官奴小女行十一月二十五日行四大熱得告行五汝

中冷褚侯遂至薨行二

第二十過此燥鷓肉行四去龍牙復下行七向欲力視汝行五

姊告慰馳情行五晚來復何如行三兄安厝情事長畢行五

第二十一十九日義之頓首明二旬增感行七十月十五

日義之頓首月半哀傷行八得示知義之報行五

第二十二安西復問

二十行

忽然夏中

九行

第二十三得阿遮書

七行

二十五日告期

六行

二十日告姜

三行知慶等

三行

二十七日告姜氏母子

五行

得書知卿

四行

第二十四初月一日義之報忽然改年

六行

卿各何以先

羸

四行

此上下不可耳出外

六行

六日告姜復雨始晴

五行

書未去得疏為慰

五行

第二十五行復二旬傷悼情深

五行

義之死罪難信非牋

五行

九月二十五日義之頓首便涉冬

六行

夫人遂善平

康也

行三

義之頓首節至遠感

行五

過一旬尋念傷悼

行四

五月九日義之頓首頓首雖未敘

行五

第二十六敬祖足下如常慰之

行五

義之頓首頓首從兄

雖篤疾

行五

轉熱想足下耳

行七

王逸少頓首晚佳也

行七

第二十七八月十七日義之報

行五

三十日告姜

行九

二十

二日告姜

行五

三十日義之頓首報

行五

信還之夜下

行七

第二十八曹丁妹

行七

未審大周婢

行七

劫事當速

行五

第二十九二十九日告仲宗

行五

十四日告劉氏女

行六

人

理之故

行四

十一月二十六日已摧退

行二

月行復旬感

傷

行七

有哀慄

行二

送此鯉魚

行三

諸婦小兒輩

第三十義之愛報

行七

復想婁安和

行九

得書知汝問

行九

第三十一十一月十三日義之頓首

行六

三月十九日義

之頓首末春哀痛義之自想上下悉佳

行五

八月十五

日具疏義之再拜

行六

第三十二義之頓首月半感慕抽切

行五

改月感慕抽痛

當奈何

行六

昨歡宴可謂意

行五

向得信知足下瘡

行五

第三十三張博士定何日去行四八月二十六日告仲宗

行十雨無復解足下可耳行五六月義之報至節哀感行四

初月一日告姜忽此年行四

第三十四極有眷意行四九月十八日義之報近問行七司

州葬送行六

第三十五十四日告期明月半行十三十三日義之報月

向半行四承上下不和反側行六過一旬哀痛無至行八昨

暮遣信值足下以行行七諸哀毒無至終日切心行七乃

復送麋勞汝

第三十六

關

第三十七得示慰之吾迎不快

行五

九月二十五日義之

報禍出不圖

行六

陰寒足下各可不

行八

五月二日告胡

母甥幸

行六

夏中節除感遠無傷

行四

第三十八四月五日義之報

行五

七日告期痛念玄度

行十

妹轉佳慶不乃啼不

行三

知靜婢猶未佳懸心

行二

治墓

下皆以集也

行三

第三十九三月十三日義之頓首頓首過二旬哀悼

行六

義之頓首頓首想冬盛念一旦感歎並哀窮

行十

十一

月十八日義之頓首頓首冬月感歎兼傷

行六

第四十十月二十二日義之頓首頓首賢從隕逝

行四

想

家悉佳

行九

吾未得便得效

行四

吏轉輒與寬休

行六

第四十一二月州民王義之死罪

行六

向書至也得示承

尊夫人轉平和

行七

五月十日義之報夏中感遠

行六

時

見賢子君家平

行三

前郡內及兄子家比有

行五

第四十二 四月二日義之頓首初月感懷

行七

得示慰之

足下克致

行六

義之白服見仲熊

行七

知汝故爾欲食

行三

第四十三 紙一千

行五

僧遠遂佳也

行三

脯五夾

行七

義之死

罪不當有桂

第四十四 不知遠妹定何當至

行八

從兄弟一旦哀窮

行四

昨遣書今日至也

行四

第四十五 知足下得吾書

行七

前比遣信

行七

想應妹普平

安

行七

臘遂佳也懸念

行八

比承至也得二書

行四

得二日

書具足下問

行四

足下在蕪湖

行九

不圖哀禍頻仍

行五

第四十六

闕

第四十七道祖重能行

行二

十月二十日義之頓首節近

歲終

行六

節除諸感蕪哀

行四

四月二十日義之頓首二

旬期等小祥

行五

新歲月感傷

第四十八義之頓首一旦公除

行四

義之頓首從弟子

行四

歲盡諸感

行五

第四十九四月九日義之頓首報臘日

行七

得二謝書司

州喪

行六

二月六日義之報昨書悉

行四

上下如常不

行五

承都開清和

行五

第五十二月二十五日義之頓首一日有書

行九

事情無

所不至惟有長歎

行五

雨後無已不審體中各何如

行九

知賢弟並毀頓

行三

第五十一義之頓首頓首何圖禍痛

行五

繇白張白騎遂

自猜疑

行七

晴便寒想轉勝

行七

六月十九日義之報仲

熊天折

行三

仲熊雖篤疾豈圖奄忽

行四

第五十二汝母子比佳不行六十八日義之頓首行四敬祖

雖久疾謂其年少行八五月二十七義之報行五五月十

一日義之敬問得旦書行三吾賢之常事耳行四

第五十三閏二月二十五日義之白行四向書想至行四八

月十四日告父行四許玄度昨宿行四七月六日義之頓

首行五省告猶示行三修年雖篤行七

第五十四六月十六日義之頓首行八義之死罪告終行十一

行二十九日義之頓首行九九月二十八日義之頓首

昨行六

第五十五前使還有書猥行九義之頓首二孫女行四四日

義之頓首昨感寒行五八月二十五日義之白頓首行五

得書為慰汝轉平復行六

第五十六周氏上下悉佳行六亡王等便以去十月禪行四

卿汝母子粗平安行八九月十三日義之頓首追傷切

割行六

第五十七義之頓首尋念痛惋行八長風一日哀窮行五得

信知問

行五

敬祖雖久疾

行四

初月五日羲之頓首忽然

此年

行六

第五十八省別具懷

行五

阿康少壯

行四

范中書奄至此

行三

妹復小進退

行五

羲之頓首昨暮兒疏

行十一

晉右軍王羲之正書行書目貞觀年河南公褚遂良中

禁西堂臨寫之際便錄出唐初有史目實此之標目蓋

其類也

書目 未見草

唐李嗣真書後品

張彥遠以李公之品甚有當處過事詞采不如直置評品

量效袁品之作又不具
人代為淺學者未深曉

昔蒼頡造書天雨粟鬼夜哭亦有感矣蓋德成而上謂
仁義禮智藝成而下謂射御書數吾作詩品猶希聞偶
合神交自然冥契者是才難也及其作畫評而登逸品
數者四人故知藝之為末信矣雖然若超吾逸品之才
者亦當夔絕於終古無復繼作故斐然有感而作書評
雖不足對揚王休弘闡神化亦名流之美事與夫飽食
終日博奕猶賢不其遠乎項籍云書足記姓名此狂夫

之言也嗟爾後生必乏經國之才又無干城之略庶幾
勉夫斯道近代虞祕監歐陽銀青房褚二僕射陸學士
王家令高司衛等亦並由此術無所間然其中亦有更
無他技而俯拾朱紱如此則雖君之盛烈苟非莘野之
器箕山之英亦何能作戒凌雲之臺拂衣碑石之際今
之馳騫去聖逾遠徒識方圓而迷點畫猶莊生之歎盲
者易象之談日中終不見矣太宗與漢王元昌褚僕射
遂良等皆受之於史陵褚首師虞後又學史乃謂陵曰

此法更不可教人是其妙處也陸學士東之受於虞祕
監虞祕監受於永禪師皆有體法今人都不聞師範又
自無鑒局雖古迹昭然永不覺悟而執燕石以為寶玩
楚鳳而稱珍不亦謬哉其議於品藻自王愔以下王僧
虔袁庾諸公已言之矣而或未周今採諸家之善聊指
同異以貽諸好事其前品已定則不復銓列素未曾入
有可措者亦後云爾太宗高宗皆稱神孔吾所伏事何
敢寓言始於秦氏終唐世凡八十一人分為十等

逸品五人

李斯

小篆

右小篆之精古今妙絕秦望諸山及皇帝玉璽猶夫千鈞强弩萬石洪鐘豈徒學者之宗匠亦是傳國之遺寶

張芝

草

鍾繇

正

羲之

三體及飛白

獻之

草書行書半草

右四賢之迹揚庭効技策勲底績神合契匠冥運天矩皆可稱曠代絕作而鍾張則筋骨有餘膚肉未贍逸少

則加減太過朱粉無設同夫披雲覩日芙蓉出水求其
盛美難以備諸然伯英章草似春虹飲澗落霞浮浦又
似渥霧沾濡繁霜搖落元常正隸如郊廟既陳俎豆斯
在又比寒澗閑壑秋山嵯峨右軍正體如陰陽四時寒
暑調暢巖廊宏敞簪裾肅穆其聲鳴也則鏗鏘金石其
芬郁也則氤氳蘭麝其難徵也則縹緲而已仙其可覲
也則昭彰而在目可謂書之聖也若草行雜體如清風
出袖明月入懷瑜瑾爛而五色黼黻摛其七采故使離

朱喪明子期失聽可謂草之聖也其飛白猶霧縠卷舒
烟雲炤灼長劒耿介而倚天勁矢超忽而無地可謂飛
白之仙也又如松巖點黛蒨鬱而起朝雲飛泉漱玉灑
散而成暮雨既離方以遁圓亦非絲而異帛趣長筆短
差難縷陳子敬草書逸氣過父如丹穴鳳舞清泉龍躍
倏忽變化莫知所成或蹴海移山或翻濤簸嶽故謝靈
運謂云公當勝右軍誠有害名教亦非徒語也而正書
行書如田野學士越叅朝列非不稽古憲章乃時有漢

體處舊說稱其轉研去鑿疎矣然數公者皆有神助若喻之制作其雅頌之流乎

評曰元常每點多異羲之萬字不同後學者恐徒傷筋
癢耳然右軍肇變古質理不應減鍾故云或謂過之便
翼每不服逸少曾得伯英十紙喪亂遺失常恨妙迹永
絕及逸少與亮書曰今見足下荅家兄書煥若神明頓
還舊觀方乃大服羲之又曾書壁而去子敬密拭之而
更別題右軍還觀之曰吾去時真大醉子敬乃心服之

然右軍終無敗累子敬往往失落及其不失則神妙無方亦可謂之草聖矣

贊曰蒼頡造書鬼哭天廩史籀湮滅陳倉藉甚秦相刻銘爛若舒錦鍾張羲獻超然逸品

上上品二人

程邈

隸

崔瑗

小篆

右程君首創隸則模範煥於丹青崔氏爰效李斯點畫皆如鐵石傳之後裔厥功亦茂此外鐫勒去之無乃賈

乎若校之文章則三都二京之比

上中品七人

蔡邕

索靖

梁鵠

鍾會

衛瓘

韋誕

皇象

右自王崔以降更無超越此數君書雅勁於韋蔡皇衛
草迹殆亞於二王鍾索遺迹雖少吾家有小鍾正書洛
神賦河南長孫氏雅所珍好用子敬草書數紙易之索

有月儀三章觀其趣況大為道竦無愧珪璋特達猶夫
聶政相如千載凜凜為不亡矣又母丘興碑云是索書
比蔡石經無相假借蔡公諸體惟范巨卿碑風華艷麗
古今冠絕王簡穆云無可以定其優劣亦何勞品書者
乎

上下品一十二人

崔寔

章

郝鑒

王廙

衛夫人

正

王洽

郝愔

李式

庾翼

羊欣

歐陽詢

虞世南

褚遂良

右逸少謂領軍弟書不減吾吾觀可有十紙信佳作矣
體裁用筆全似逸少虛薄不倫右軍藻鑒豈當虛發蓋
欲假其名譽耳前品措之中下豈所謂允僉望哉崔衛
素負高名王庾舊稱拔萃崔章書甚妙衛正體尤絕世
將楷則遠類羲之猶有古制稚恭章草頗推筆力不謝
子真郝李縱邁過於羊欣歐陽草書難與競爽如旱蛟

得水饒兔走穴筆勢恨少善於鐫勒及飛白諸勢如武庫矛戟雄劒森森虞世南蕭散灑落真草惟命如羅綺嬌春鵷鴻戲沼故當子雲之上褚氏臨寫右軍亦為高足豐艷雕刻盛為當今所尚但恨乏自然功勤精悉耳評曰蟲篆者小學之所宗草隸者士人之所尚近代君子故多好之或時有可觀耳然許靜之迹殆不減小令常歎云小鍾書初不留意試作之乃不可得研之彌久如有髣髴乃知有畫龍之感耳安可厚誣乎此羣英允

居上流三品其中銓鑒不無優劣

贊曰程邈隸體崔公篆勢梁李蔡索郝皇韋衛羊習獻
規褚傳義制邈乎天壤光厥來裔

中上品七人

張昶

文舒

衛恒

杜預

張翼

郝嘉賓

阮研

漢王元昌

右文舒西嶽碑文但覺妍冶殊無骨氣庾公置之七品

張翼代義之草奏雖曰小人幾乎亂真更乃編之乙科
涇渭混淆奇難品會至於衛杜之筆流傳多矣縱任輕
巧流轉風媚剛健非有餘便媚少儔匹嘉賓與王庾相
將是則高手顏黃門有言阮交州蕭國子陶隱居各得
右軍一體故稱當時之冠絕然蕭公力薄終不迨阮漢
王作獻之氣勢或如舞劍往無隣幾

中中品十二人

謝安

康昕

桓玄

丘道護

許靜

蕭子雲

陶弘景

釋智永

劉珉

房玄齡

陸柬之

王知敬

右謝公縱任自在有螭盤虎踞之勢康昕巧密精勤有
翰飛鶯哢之體桓玄如驚蛇入草銛鋒出匣劉珉比顛
波赴壑狂澗爭流隱居顓脫得書之筋髓如麗景霜空
鷹隼初擊道護謬登高品迹乃浮漫陸柬之學虞草體
用筆則青出於藍故非子雲之徒正隸功夫恨少不至

高絕也智永精熟過人惜無奇態矣房司空雕文抱質
王家令碎玉殘金房如海上雙鷁王比雲間孤鶴

評曰古之學者皆有師法今之學者但任胸懷無自然
之逸氣有師心之獨往偶有能者時見一點忽有不悟
者終身瞑目而欲乘款段度越驂騑其亦難矣吾嘗告
勉夫後生曰古歎知音希可為絕絃者也

贊曰西嶽張昶江東阮研銀鷹貞白鐵馬桓玄衛杜花
散安康綺鮮元昌陸柬名後身先

中下品七人

孫皓

張超

謝道韞

宋炳

宋文帝

齊高帝

謝靈運

右孫皓吳人酣暢驕其家室雖欲矜豪亦復平矣張如
郢中少年乍入京輦縱有才辯蓋亦可知謝韞是王凝
之之妻雍容和雅芬馥可玩宋文帝有子敬風骨超縱
狼藉翕煥為美康樂往往驚道高帝時時合興知慕韓

彭之豹變有異張桓之拾青宋炳放逸屈攝頗效康許
量其直置孤梗是靈運之流

下上品十三人

陸機

袁崧

李夫人

謝朓

庾肩吾

蕭綸

王褒

斛斯彥明

房彥謙

殷令名

張大隱

蘭靜文

錢穀

右士衡以下時然合作踳雜不倫或類蚌質珠胎乍比
金沙銀礫陸平原李夫人猶帶古風謝吏部庾尚書創
得今韻邵陵王王司空是東陽之亞房司隸張益州叅
小令之體蘭生正書甚為鮮緊殊有規則錢氏小篆飛
白寬博敏麗太宗貴之斛斯筆勢咸有由來司隸宛轉
頗稱流悅皆藉名美殷氏擅聲題署代有其人嗟乎有
天才者或未能精之有神骨者則其功虛棄但有佳處
豈忘存錄

下中品十人

范曄

蕭思話

張融

思光

梁簡文帝

劉逖

王晏

周顥

王崇素

釋智果

虞綽

右范如寒雋之士亦不可棄蕭比遁世之夫時或堪採
思光要自標舉蓋無足褒簡文拔羣貴勝猶難繼作劉
黃門落花從風王中書竒石當逕彥倫意則甚高迹少

俊銳崇素時象麗人之姿智果頗似委章之質虞綽鋒
穎迅健亦又次之矣

下下品七人

劉穆之

褚淵

梁武帝

梁元帝

沈君理

陳文帝

張正見

右數君亦稱筆札多類效嘖猶枯林之青秀一枝比衆
石之孤生片琰就中彥回輕快練倩有力孝元風流君

理放任亦後來之所習非先達之所營吾黨論書有異於是

評曰前品云蕭思話如舞女低腰仙人嘯樹亦則仙矣又云張伯英如漢武學道憑虛欲仙終不成矣商摧如此不亦謬乎吾今品藻亦未能至當若其顛倒衣裳白圭之玷則庶不為也後來君子儻為鑒焉

贊曰蚌質懷珠銀環蘊礫陸謝參蹤蕭王繼迹思話仙才張融賞擊如彼枯秀衆多羣石

唐武平一徐氏法書記

先賢所評子敬之比逸少猶士季之比元常言去之遠矣故二王之迹歷代寶之梁大同中武帝勅周興嗣撰十字文使殷鐵石模次羲之之迹以賜八王右軍之書咸歸梁室屬侯景之亂兵火之後多從湮缺而西臺諸宮尚積餘寶元帝之死一皆自焚歷周至隋初并天下大業之始後主頗求其書往往有獻之者及隋之季王師入秦又於洛陽擒二偽主兩京祕閣之寶揚都扈從

之書皆為我有太宗於右軍之書特留睿賞貞觀初下
詔購求殆盡遺逸萬幾之暇備加執玩蘭亭樂毅尤聞
寶重嘗令搨書人湯普徹等搨蘭亭賜梁公房玄齡已
下八人普徹竊搨以出故在外傳之及太宗晏駕本入
玄宮至高宗又勅馮承素諸葛貞搨樂毅論及雜帖數
本賜長孫無忌等六人在外方有洎大聖天后御極也
尤為寶嗇平一齧齧之歲見育宮中切覩先后閱法書
數軸將搨以賜潘邸時見宮人出六十餘函於億歲殿

曝之多裝以鏤牙軸紫羅標云是太宗時所裝其中有
故青綾標玳瑁軸者云是梁朝舊跡標首各題篇目行
字等數章草書多於其側帖以真字楷書每函可二十
餘卷別有一小函可有十餘卷於所記憶者是扇書樂
毅告誓黃庭當時私訪所主女學問其函出盡否荅云
尚有未知幾許至中宗神龍中貴戚寵盛宮禁不嚴御
府之珍多入私室先盡金壁次及書法嬪主之家因此
擅出或有報安樂公主者主於內出二十餘函駙馬武

延秀久踐虜庭無功於此徒聞二王之跡強學寶重乃
呼薛稷鄭愔及平一評其善惡諸人隨事荅稱為上者
登時去牙軸紫標易以漆軸黃麻紙標題云特健藥云
是虜語其書合作者時有太宗御筆於後題之歎其雄
逸太平公主聞之遽於內取數函及樂毅等小函以歸
延秀之死側聞睿宗命薛稷擇而進之薛竊留佳者十
數軸薛之敗也為簿錄官所盜平一任郴州日與太平
子薛崇胤堂兄崇允連官說太平之敗崇徹懷樂毅等

七軸請崇允託其叔駙馬璪貽岐王以求免戾此書因
歸邸第崇徹弟崇簡娶梁宣王女主家王室之書亦為
其所有後獲罪謫五溪書歸御府而朝士王公亦往往
有之豫州刺史東海徐公嶠之季子浩並有獻之之妙
待詔金門家多法書見託斯題其篇目行字列之如後
詹事張庭珪之家抑其次也

唐徐浩論書

周官內史教國子六書書之源流其來尚矣程邈變隸

體邯鄲傳楷法事則朴略未有功能厥後鍾善真書張
稱草聖右軍行法小令破體皆一時之妙近古蕭永歐
虞頗傳筆勢褚薛已降自鄒不譏矣然人謂虞得其筋
褚得其肉歐得其骨當矣夫鷹隼乏彩而翰飛戾天骨
勁而氣猛也翬翟備色而翔翔百步肉豐而力沉也若
藻曜而高翔書之鳳凰矣歐虞為鷹隼褚薛為翬翟焉
歐陽率更云蕭書出於章草頗為知言然歐陽飛白曠
古無比浩自言余年在齟齬便工翰墨力不可強勤而

愈拙區區碑石之間矻矻几案之上亦古人所恥吾豈
忘情耶德成而上藝成而下則殷鑒不遠何學書為必
以一時風流千里面目斯亦愈於博奕亞於文章矣初
學之際宜先筋骨筋骨不立肉何所附用筆之勢特須
藏鋒鋒若不藏字則有病病且未去能何有焉字不欲
疎亦不欲密亦不欲大亦不欲小小長令大大蹙令小
疎肥令密密瘦令疎斯其大經矣筆不欲捷亦不欲徐
亦不欲平亦不欲側側豎令平平竣使側捷則須安徐

則須利如此則其大較矣張伯英臨池學書池水盡墨
永師登樓不下四十餘年張公精熟號為草聖永師拘
滯終著能名以此而言非一朝一夕所能盡美俗云書
無百日工蓋悠悠之談也宜白首攻之豈可百日乎

唐徐浩古蹟記

自伏羲畫八卦史籀造籀文李斯作篆書程邈起隸法
王次仲為八分體漢章帝始為章草名厥後流傳工能
間出史籀石鼓文崔子玉篆呂望張衡碑李斯嶧山會

稽山碑蔡邕鴻都三體石經八分西岳光和殷華馮敦
等數碑并伯喈章草並為曠絕及張芝章草鍾繇正楷
時莫其先衛瓘索靖章草王羲之真行章草桓玄草謝
安王獻之羊欣王僧虔孔琳之薄紹之真行草永禪師
蕭子雲真草虞世南歐陽詢褚遂良果師述師真行草
陸柬之臨書臣先祖故益州九隴縣尉贈吏部侍郎師
道臣先考故洺州刺史贈左常侍嶠之真行草皆名冠
古今無與為比齊梁以後傳祕此書跋尾徐僧權唐懷

充姚懷珍滿騫朱异等署名太宗皇帝肇開帝業大購
圖書寶於內庫鍾繇張芝弟昶王羲之父子書四百
卷及漢魏晉宋齊梁雜迹三百卷貞觀十三年十二月
裝成部帙以貞觀字印印縫命起居郎臣褚遂良排署
如後

司空許州都督趙國公臣無忌

開府儀同三司尚書左僕射太子少師梁國公臣

玄齡

特進尚書左僕射申國公臣士廉

特進鄭國公臣徵

逆人侯君集初同署

犯法後
楷印

中書令駙馬都尉安德郡開國公臣楊師道

左衛大將軍武陽縣開國公臣李大亮

光祿大夫禮部尚書河間王臣孝恭

光祿大夫民部尚書莒國公臣唐儉

兼太常卿扶陽縣開國男臣韋挺

從十三年書更不出外人莫見直至大定中則天太后
賞納言狄仁傑能書仁傑云臣自幼以來不見好本只
率愚性何由得能則天乃內出二王真迹二十卷遣五
品中使示諸宰相看訖表謝登時將入至中宗時中書
令宗楚客奏事承恩乃乞大小二王真蹟勅賜二十卷
大小各十軸楚客遂裝作十二扇屏風以褚遂良閒居
賦枯樹賦為脚因大人貴要張以示之時薛稷崔湜盧
藏用廢食歎美不復宴樂安樂公主婿武延秀在坐歸

以告公主曰主言承恩未為富貴適過宗令別得賜書
一席觀之輟餐忘食及明謁見頗有怨言帝令開緘傾
庫悉與之延秀復會賓客舉櫃令看分散朝廷無復寶
惜太平公主取五帙五十卷別造胡書四字印縫宰相
各三十卷將軍駙馬各十卷自此內庫真蹟散落諸家
太平公主愛樂穀論以織成袋盛置作箱裹及籍沒後
有咸陽老嫗竊舉袖中縣吏尋覺遽而奔赴嫗乃驚懼
投之竈下香聞數里不可復得天寶中臣充使訪圖書

有商胡穆聿在書行販古跡往往以織成標軸得好圖

書臣奏直集賢令求書畫玄宗開元五年十一月五日

收綴大小二王真迹得一百五十八卷大王正書三卷

黃庭經第一畫讚第二告誓第三臣以為畫讚是偽迹不近真行書一百五卷並不著名姓帖

草書一百五十卷以前得君小王書都三十卷正書兩

卷論語一卷并注一卷寫成為第一

跋尾排署如後

右散騎常侍崇文館學士舒國公臣褚無量

祕書監兼侍讀昭文館學士上柱國常山縣公臣

馬懷素

開府儀同三司上柱國梁國公臣姚崇

銀青光祿大夫行中書侍郎同中書門下平章事

監脩國史上柱國許國公頊

銀青光祿大夫守吏部尚書兼侍中監脩國史上

柱國廣平郡開國公臣璟

至十七年出付集賢院搨二十本賜皇太子諸王學士

九年收八內十八年十二月二十八日尚書左丞相集
賢大學士燕國公張說薨明年二月以中書令蕭嵩為
大學士令訪二王書乃於滑州司法路琦家得羲之正
書扇書一卷是貞觀十五年五月五日揚州大都督尉
馬都尉安德郡開國公楊師道進其標是碧地織成標
頭一行濶一寸黃色織成云晉右將軍王羲之正書卷
第四無小王行書三紙非常合作亦既進奉賜路琦絹
二百疋蕭嵩二百疋其書還出令集賢院搨賜太子以

下及潼關失守內庫法書皆散失初收城後臣又充使
搜訪圖書收獲二王書二百餘卷訪黃庭經真蹟或云
張通儒將向幽州莫知去處侍御史集賢直學士史惟
則奉使晉州推事所在博訪書畫懸爵賞待之時趙城
倉督隱沒公貨極多推案承伏遂云有好書欲請贖罪
惟則索看遂出扇書告誓等四卷并二王真蹟四卷問
其得處云祿山下將過向太原停於倉督家三月餘日
某乙祇供稱意有懷悅之心乃留此書相贈惟則將至

闕下肅宗賜絹百疋擢授本縣尉臣從中書舍人兼尚書右丞集賢學士副知院事改國子祭酒尋黜廬州長史承前偽迹臣所棄者盡被收買皆獲官賞不復簡退人莫知之及吐蕃入寇圖籍無遺往往市廛時有真迹代無鑒者詐偽莫分臣今暮年心惛眼暗恐先朝露敢舉所知其別書人謹錄如右前試國子司業兼太原縣令竇蒙蒙弟檢校戶部員外郎宋汴節度參謀竇泉並久遊翰苑皆好圖書辨偽知真無出其右臣長男璿臣

自教授幼勤學書在於真行頗知筆法使定古迹亦勝
常人其餘士庶之間應有精別之者臣所未見非欲自
媒天高聽卑伏希俯察建中四年三月日

唐何延之蘭亭記

蘭亭者晉右將軍會稽內史琅琊王羲之字逸少所書
之詩序也右軍蟬聯美胄蕭散名賢雅好山水尤善草
隸以晉穆帝永和九年暮春三月三日宦遊山陰與太
原孫統承公孫綽興公廣漢王彬之道生陳郡謝安安

石高平郝曇重熙太原王蘊叔仁釋支遁道林并逸少
子凝徽操之等四十有一人修袂袂之禮揮毫製序興
樂而書用蠶繭紙鼠鬚筆道媚勁健絕代更無凡二十
八行三百二十四字有重者皆構別體就中之字最多
乃有二十許箇變轉悉異遂無同者其時廼有神助及
醒後他日更書數十百本無如袂袂所書之者右軍亦
自珍愛寶重此書留付子孫傳掌至七代孫智永永即
右軍第五子徽之之後安西成王諮議彥祖之孫廬陵

王胄昱之子陳郡謝少卿之外孫也與兄孝賓俱捨家入道俗號永禪師禪師克嗣良裘精勤此藝常居永欣寺閣上臨書所退筆頭置之於大竹簾簾受一石餘而五簾皆滿凡三十年於閣上臨得真草千文好者八百餘本浙東諸寺各施一本今有存者猶直錢數萬孝賓改名惠欣兄弟初落髮時住會稽嘉祥寺寺即右軍之舊宅也後以每年拜墓便近因移此寺自右軍之墳及右軍叔薈已下塋域並置山陰縣西南三十一里蘭渚

山下梁武帝以欣永二人皆能崇於釋教故號所住之
寺為永欣焉事見會稽志其臨書之閣至今尚在禪師
年近百歲乃終其遺書並付弟子辯才辯才俗姓袁氏
梁司空昂之玄孫辯才博學工文琴碁書畫皆得其妙
每臨禪師之書逼真亂本辯才嘗於所寢方丈梁上鑿
其暗檻以貯蘭亭保惜貴重甚於禪師在日至貞觀中
太宗以德政之暇銳志耽書臨寫右軍真草書帖購募
備盡唯未得蘭亭尋討此書知在辯才之所乃降勅追

師入內道場供養恩賚優洽數日後因言次乃問及蘭亭方便善誘無所不至辯才確稱往日侍奉先師實嘗獲見自禪師歿後荐經喪亂墜失不知所在既而不獲遂放歸越中後更推究不離辯才之處又勅追辯才入內重問蘭亭如此者三度竟靳固不出上謂侍臣曰右軍之書朕所偏寶就中逸少之迹莫如蘭亭求見此書營於寤寐此僧耆年又無所用若為得一智略之士以設謀計取之尚書右僕射房玄齡奏曰臣聞監察御史

蕭翼者梁元帝之曾孫今貫魏州莘縣負才藝多權謀
可充此使必當見獲太宗遂詔見翼翼奏曰若作公使
義無得理臣請私行詣彼須得二王雜帖三數通太宗
依給翼遂改冠微服至湘潭隨商人船下至於越州又
衣黃衫極寬長潦倒得山東書生之體日暮入寺巡廊
以觀壁畫過辯才院止於門前辯才遙見翼乃問曰何
處檀越翼乃就前禮拜云弟子是北人將少許蠶種來
賣歷寺縱觀幸遇禪師寒溫既畢語議便合因延入房

內即共圍碁撫琴投壺握槊談說文史意甚相得乃曰
白頭如新傾蓋若舊今後無形迹也使留夜宿設垆面
藥酒茶果等江東云垆面猶河北稱甕頭謂初熟酒也
酣樂之後請各賦詩辯才探得來字韻其詩曰初醞一
垆開新知萬里來披雲同落莫步月共徘徊夜久孤琴
思風長旅雁哀非君有祕術誰照不然灰蕭翼探得招
字韻詩曰邂逅款良宵殷勤荷勝招彌天俄若舊初地
豈成遙酒蟻傾還泛心猿躁似調誰憐失羣翼長苦葉

風飄妍蚩略同彼此諷味恨相知之晚通宵盡歡明日乃去辯才云檀越閒即更來此翼乃載酒赴之興後作詩如此者數四詩酒為務其俗混然遂經旬朔翼示師梁元帝自畫職貢圖師嗟賞不已因談論翰墨翼曰弟子先門皆傳二王楷書法弟子又幼來耽翫今亦有數帖自隨辯才欣然曰明日來可把此看翼依期而往出其書以示辯才辯才熟詳之曰是即是矣然未佳善貧道有一真跡頗亦殊常翼曰何帖辯才曰蘭亭翼佯笑

曰數經亂離真跡豈在必是響搨偽作耳辯才曰禪師
在日保惜臨亡之時親付於吾付受有緒那得參差可
明日來看及翼到師自於屋梁上楹內出之翼見訖故
駁瑕指額曰果是響搨書也紛競不定自示翼之後更
不復安於梁楹上并蕭翼二王諸帖並借留置于几案
之間辯才時年八十餘每日於窻下臨學數遍其老而
篤好也如此自是翼往還既數童弟等無復猜疑後辯
才出赴靈汜橋南嚴遷家齋翼遂私來房前謂弟子曰

翼遺却帛子在床上童子即為開門翼遂於案上取得
蘭亭及御府二王書帖便赴永安驛告驛長凌慙曰我
是御史奉勅來此有墨勅可報汝都督齊善行善行即
竇建德之妹壻在偽夏之時為右僕射以用吾曹門廬
江節公及隋黃門侍郎裴矩之策舉國歸降我唐由此
不失貴仕遙授上柱國金印紱綬封真定縣公於是善
行聞之馳來拜謁蕭翼因宣示勅旨具告所由善行走
使人召辯才辯才仍在嚴遷家未還寺遽見追呼不知

所以又遣散直云侍御須見及師來見御史乃是房中
蕭生也蕭翼報云奉勅遣來取蘭亭蘭亭今得矣故喚
師來取別辯才聞語身便絕倒良久始蘇翼便馳驛而
發至都奏御太宗大悅以玄齡舉得其人賞錦綵千段
擢拜翼為員外郎加入五品賜銀瓶一金鏤瓶一瑪瑙
碗一並實以珠肉廐良馬兩匹兼寶裝鞍轡莊宅各一
區太宗初怒老僧之祕恡俄以其年毫不忍加刑數日
後仍賜物三千段穀三千石便勅越州支給辯才不敢

將人己用廻造三層寶塔塔甚精麗至今猶存老僧因
驚悸患重不能強飯唯歎粥歲餘乃卒帝命供奉榻書
人趙模韓道政馮承素諸葛貞等四人各榻數本以賜皇
太子諸王近臣貞觀二十三年聖躬不豫幸玉華宮含
風殿臨崩謂高宗曰吾欲從汝求一物汝誠孝也豈能
違吾心耶汝意如何高宗哽咽流涕引耳而聽受制命
太宗曰吾所欲得蘭亭可與我將去及弓劍不遺同軌
畢至隨仙駕入玄宮矣今趙模等所榻在者一本尚直

錢數萬也人間本亦稀少代之珍寶難可再見吾嘗為
左千牛時隨牒適越航巨海登會稽探禹穴訪奇書名
僧處士猶倍諸郡固知虞預之著會稽典錄人物不絕
信而有徵其辯才弟子玄素俗姓楊氏華陰人也漢太
尉之後六代祖佺期為桓玄所害子孫避難潛竄江東
後遂編貫山陰即吾之外氏近屬今殿中侍御史瑒之
族長安二年素師已年九十二視聽不衰猶居永欣寺
永禪師之故房親向吾說聊以退食之暇略疏其始末

庶將來君子知吾心之所存付永

彭年

明

察微

溫

抱直

超

令叔

等

兄弟其有好事同志須知者亦無隱焉于時歲在甲寅
季春之月上己之日感前代之修禊而撰此記主上每
暇隙留神術藝迹逾華聖偏重蘭亭僕開元十年四
月二十七日任均州刺史蒙恩許拜掃至都承訪所得
委曲緣病不獲詣闕遣男昭成皇太后挽郎吏部常選
騎都尉永寫本進其日奉日曜門宣勅內出絹三十疋
賜永於是負恩荷澤手舞足蹈捧戴周旋光駭閭里僕

跼天聞命伏枕懷欣殊私忽臨沉疴頓減輒題卷末以示後代

唐褚河南搨本樂毅論記

貞觀十三年四月九日奉勅內出樂毅論是王右軍真跡令將仕郎直弘文館馮承素模寫賜司空趙國公長孫無忌開府儀同三司尚書左僕射梁國公房玄齡特進尚書左僕射申國公高士廉吏部尚書陳國公侯君集特進鄭國公魏徵侍中護軍安德郡開國公楊師道

等六人於是在外乃有六本並筆勢精妙備盡楷則褚遂良記

唐崔備壁書飛白蕭字記

壁書蕭字者梁侍中蕭子雲之所飛白也

張懷瓘書斷云飛白書變

楷制也宮殿題署勢大則徑大字宜輕微不滿

韓晉公領浙西之歲得於建鄴

佛寺置之南徐官舍函以屋壁俯瞰坐隅及晉公入贊廟暮啓于私第朱方官吏俟其代者完葺舊府圯墁故堂吏人以壁字昏蒙方以堊掃塗上時故殿中李侍御

士舉為部從事以晉公翰墨代無等儔自護壁書施榻于下耽翫研味略無已時士舉重焉給而方得及士舉府除職停寓壁字於小吏之舍至甲申歲士舉為江西從事通好江淮時李評事約盛閱圖書以示寮友士舉方以壁字言於座中李君因而求之士舉云得卿皇象羊欣蕭綸各一帖大鄭畫屏一扇即輟與之不爾當自持去李君富於圖書酷好遐異遂以所求三帖并法士畫屏一扇易焉後十餘日壁書自吳負來士舉於道病

卒向若李君不閱雅跡士舉不言此書即壁字為朽壤
於小吏之家逸品絕前賢之跡固知興亡繼絕後不乏
人工極藝精中必有物加以子雲與國同姓所書蕭字
園卷側掠體法備焉信衆賢之妙門實後代之茂範其

飛白書起於蔡中郎

蔡邕待詔門下見役人以墜帚成字心有悅焉歸而為飛白書漢末

魏初皆以題署宮闕蕭子良撰古今書體云飛白書熹平年節治鴻都門於時蔡邕方撰聖皇篇

其後

張敬禮王逸少子敬並稱妙絕子雲曲盡其法歐陽率
更云蕭侍中飛白輕濃得中如蟬翼掩素其為前賢所

重如此嗟乎景嶠此書今訪天下絕矣惟此蕭字在乎
舊都三百年間竟無顏圯俾後之傳授似陰有保持余
與李君寓家南徐隣而友善獲覩妙跡感有將壞之壤
晉公出之方絕之跡李君維之用徵其事故以字志之

唐李約壁書飛白蕭字贊

梁侍中蕭子雲書祖述鍾王備該衆體始變蔡張二王

飛白古法妙絕冠時

古法飛白多其體猶拘八分故王僧虔云飛白是八分之輕者自

子雲變而飛多今但據飛多者即非子雲之前而雖名
不妨後人亦有效古飛少者子雲又作小篆飛白

存傳記而迹絕簡素惟建鄴古壁餘此蕭字焉韓晉公
鑒古善書聞之嗟異遷之於南徐置于海榴堂座右之

壁

又獲齊竟陵王蕭子良龍爪書十五字置于招隱寺以侍中之迹妙極故留以親翫

余後獲之

載以入洛書之故實事之本末中書舍人張公崔監察
備撰記詳焉余少好圖書耽嗜奇古由此雖志業不立
而性莫能遷非不干求爵祿心惜時事以與名疎非欲
乖時好尚養疴守獨所見遂僻僻則僻矣與夫酣酒聲
妓并走權利者俱亡羊也亡則孰多余每閱翫此迹而


圖書之光如蓬古人似得良友加以琴酒靜暢書齋晝
閒榮富賤貧是日何在至若尋翰墨輕濃之勢窮點畫
分布之能與日彌深隨見逾妙嗟夫昔賢垂不朽之藝
知傳寶於後世後人覩妙絕之迹見得意於當時名齊
日月情契古今傳曰遊於藝藝可已乎知者相賀比獲
蘭亭之書世情觀之未若野人之塊不闕於世在世為
無用之物苟適余意於余則有用已多乃作贊曰昔創
飛白蔡氏所得起於堊帚播於翰墨張王繼作子雲精

極壁昏蜃素墨古池色翻飛露白乍輕乍濃翠箔映雪
羅衣從風崩雲委地游霧縈空撥刺勢動蜉蝣蟠氣雄昆
池駭鯨時門鬪龍攢毫疊孔或橫或縱層層陣雲森森
古松君子沉德高人比蹤抱素自潔含章內融逸疑方
外縱在矩中密而不離疎而有容藝通造化比象無窮
子雲臣梁蕭字逾貴點畫均豐姿形端異迹絕壘素名
空傳記明徵褒貶惟此一字

唐高平公蕭齋記

隴西李君約於江南得蕭子雲壁書飛白蕭字以筆勢
驚絕遂匣而寶之其遇之之由則君之贊序與崔監察
備論之詳矣君與字俱載舟還洛陽仁風里第思所以
盡其瞻玩藏置之宜謂箱櫝臨視不時又有絨啓動搖
之變遂建精室陷列于垣復本書之意得遙觀之美寂
對虛牖勢若飛驚雖烟霧交飛龍鸞縈動輕旆翻揚微
雲卷舒不能狀也李君以至行雅操著名當時逍遙道
樞脫落榮利識洞物表神交古人而風致之餘特精楷

隸所得魏晉已降名書祕迹多矣以不越於尺素之間
未為殊珍也蓋壁字奇蹤乃為希寶意象所得非常域
也故異而室之文而志之夫蕭之為言也切然而清於
文也蔚然而整宜乎銘壁宜乎命齋蕭齋之名於此字
俱傳矣



法書要錄卷三